

## Pauro Korītiō ezeḱtsa bo ziwatahakazo

Wastuhu Korītiō ezeḱtsa Pauro ziwatahaka naha humo batu siakparawy. Iwatahi ziwatahakazo tahyrikosokdawy soho humo nisispirikpoko. Deus Pauro tuk ziknapykyrykta hi iwatsahi katsa kino niwatihi Deus soho humo tanymyryky.

<sup>1</sup> Uta Pauro, Sesus Kiristu ykzohota iwa hi Deus nizihikik. Ikiāhatsa Korītiō ezeḱtsa bo piwataha. Asaktsa Deus tyryktsa, Akaija ezeḱtsa bo niwatihi piwataha. Asahi Sesus harere bo hyŷ nikananaha. Timoteo humo katsa mymypoḱzitsirētsa mytsy wata atahi katuk ahabo piwatahaka.

<sup>2</sup> Deus myzo Sesus Kiristu mypehakatsa iwaze sibo mopamykysokoze utakta:

– O myzo Korītiō ezeḱtsa tsysipokzitsihikikta! Sibo tsysapywyky iwaze batu paikpa mytsaty mykaranaha sakurētsa mykaranaha – my. Iwa Deus bo ahatsyhyryze mopamykysoko.

*Pauro Deus humo tsakurēta nikara.*

<sup>3</sup> Katsaktsa Deus bo tihiktsa:

– O Deus myzo ikia zuba tsamysapyrēta ikia hi mypehakatsa Sesus Kiristuzo. Ikia zuba myhumo tsamypoḱzitsiukrēta, iwatahi myzo babata – tsimaha.

<sup>4</sup> Atahi sinini tsimykaranahaze mymytsumuēhī. Paikpa mytsaty tsimykaranahaze mymykuwyky. Deus hi:

– Pahatsumuēhī ikiāhatsa niwatihi ustsa kytsa sinini mykaranahaze tsysitsumuēhīnaha iwahi

natatsihikik – iwa myhyrinomyrētsa Deus hi nimyhyrinomyryky.

<sup>5</sup> Kiristu mytsyhyryze sinini nikara. Katsa kino niwatihi Sesus Kiristu humo tsikspirikpokonahaze ihumo sinini tsimykaranaha. Iwatsa tu sinini tsimykaranaha zeka atahi mymykuwyky. Iwatsahi ihumo mypunihikrētsa tsimoziknaha.

<sup>6</sup> Tapara ahabo iktsasoko Deus nimytsumuēhīkī nawa Deus mymytsapuhyripyrywyky Kiristu mysapyzekenihyrikosokda iwatsahi sinini ykarawy bo batu zikaha. Kytsa asaktsa Deus batu siakparawy mymysukyrykynaha. Mymysukyrykiknahaze Deus mymytsumuēhī atahi mymykuwyky ana humo kino ahahyrinomyrētsa.

<sup>7</sup> Iwaze uta ahasoho humo kaspihikrēta. Ikiahatsa hi:

– Hawa Deus kytsa mysitsumuēhīkīkze iktsa tsimaha, iwatsahi asaktsa Deus batu siakparawy mymysukyrykynahaze Deus mymytsumuēhī, ihumo mypunihikrētsa tsimoziknaha iwahi ustsakytša mysitsumuēhīkī niwatihi – tsimaha.

<sup>8</sup> Katsaktsa Asia eze tuze hawa tsihokdaharēna imysapybara ty mybo nikara. Anahi ahabo mot-sasoko iwaze tsinymyrykynaha. Kytsa nimyit-sapyriwykynaha. Sinini tsikykaranaha. Iwaze mypetu tsikykaranaha:

– O abahi katsa tsimyokbanahatsa watsa.

<sup>9</sup> Ustsakytša mymybanaha bo – mytsaty tsikykaranaha. Iwa mytsaty ahabyitsa tu tsikaha. Batu mypunihik. Iwaze mspihikbyitsa tu tsimykaranaha. Iwaze Deus zuba mymytsumuēhī ana humo hi myhyrinomyrētsa. Ata zuba

siakbatsa mynasihyrižikpowy. Iwaze sinini tsimykarana haze batu mytsaty tsimykarana ha — O katsa mypunihikrētsa tsimaha — iwa batu mypetu mysopyk. Ihumo zuba mypunihikrētsa iwa Deus nimyhyrinomyryky.

<sup>10</sup> Ata pokzi hi kytsa nimybakzykynahaze nymytsumuēhīkī iwatsahi tsikwaknaha. Iwaze katsaktsa:

— O atahi mymytsumuēhīkīk iwaze ihumo myspirikporētsa — tsimykarana ha.

<sup>11</sup> Ikiahatsa niwatihi Deus bo mytsyhyryze tsimypamykysonahaktsa! Mytsyhyryze Deus bo tsimypamykysonahaze Deus mymytsumuēhīkī. Isapyrēnikia ty mybo nyny my. Myhumo tsimypokzitsiukrēta iwaze kytsa ipe:

— O myzo Pauro tuktsa humo niwatihi sihumo tysipokzitsiki, ikia zuba tsamysapyrēta — maha. Iwa kytsa sizubarētsa Deus humo sakurētsa maha.

*Pauro ta soho humo meky watu nikara.*

<sup>12</sup> Iwaze mypetu mysopyk katsaktsa wasani tsimykarana ha, Deus humo wasani mysopyk. Iki-ahatsa humo hi tsimypokzitsiukrētsa iwatsahi mykurētsa. Deus humo ahabo simypokzitsirētsa batu ahabo zuba tsikykarana ha. Deus mymytsumuēhīkī iwatsahi wasani tsimyzurukunaha ana humo hi mykurētsa.

<sup>13</sup> Iwatsahi ahabo tsiwatahakanahaze ihokdahabara ty tsikykarana ha ipiktsīhibara ty zuba tsikykara naha tsimyspirikponaha. Abaka iwa ape iky hỹ tozeka ja tsimyspirikpo

<sup>14</sup> Ikiahatsa tsikaeni zuba mysoho humo tsinymyrynaha. Uta hi: — Aibani tsinymyrybabanahaze myhumo ahakurētsa

– iwa mozihihikik. Sesus Kiristu mypehakatsa myziksizoze myhumo ahakurētsa mywatsa aahummo mykurētsa.

<sup>15-16</sup> Niytahi utakta ahabo mytsaty ikykaraze iknakozore tsihikik Masedonia bo moparakze:

– O Masedonia bo moparakze Korītio ezektsa bo mynakozore. Myziksizoze niwatihi Korītio ezektsa bozo my. Nawa petok babaha sibo mynakozore iwatahi mysihyrinymyryze sakurētsa. Sudeja bo my zeka piktsumuēhīnaha – iwa mytsaty ikykara.

<sup>17</sup> Anasoho ty ba ziky. Ana humo hi tsipik-sapybyikinaha. Ahaokze ka – O Pauro hawa sa mykara batu ihyrinymyry. Batu ispirikpo batu imysapy – tsimaha. Iwa kasoho humo mytsaty tsimykaranaha.

<sup>18</sup> Iwa batu ba my. Deus ba zikmyspihik-bata, Deus ta wasape zuba mykara. Uta kino niwatihi batu mybarapetu kasopyk. Wasape mykara iwata wasani mykara. Deus ana humo hi tsihyrinymyrēta. Ikiatsa batu tyso:

– O Pauro hawa motsaso zeka wasani ja mykara – Iwa batu tyso.

<sup>19</sup> Utakta Deus wasania ty Sesus Kiristu soho ahabo iktsasoko. Timoteo, Siras ahatsa katuk Sesus Kiristu Deus tse babata ziknatsasoikiknaha. Hawaha isoho ty tsiktsasonaha wasani ana harere humo hi wasape my.

<sup>20</sup> Deus mype:

– Hawa tisapyrēna my pahasapywyky – my. Sesus Kiristu humo hi imysapyrēna ty mybo nyny my. Katsaktsa:

– Hawa haty Deus mybo nitsasoko atsatu wasani mykara. Iharere mybo tsizubarēna. Kiristu humo zuba iharere bo yhỹ mynakara. Iharere baba zuba. Iwa kytsa sizubarētsa bo tsimytsasonaha. Iwatsahi kytsa hi: “O Deus tsamysapyrēta” – mykaranaha.

<sup>21</sup> Deus hi mymytsumuēh̄iekik. Katsaktsa ikiahatsa kino niwatihi Kiristu tyryktsa tsimoziknaha ana humo hi nimywatawy.

<sup>22</sup> Mynaro mynamy humo tsipiwatahanaha iwatsahi kytsa mynamy humo sihyrinymyrētsa. Iwatahi Deus hyrikoso mytuk mynapykyryk Deus tihi: – Asaktsa kahyrytsa – mykara. Deus hyrikoso mytuk mynapykyryk zeka iwaze usa isapyrēnikia ty mybo nyny my.

<sup>23</sup> Deus okze ahabo motsasoko. Iokpyrykytatu batu. Ikiahatsa bo mynakozore zeka pahabet-sakak. Pahabetsakak zeka ahasukatsihikrētsa tsimoziknaha. Iwatahi batu ahabo zuk.

<sup>24</sup> Ikiahatsa botu Sesus harere bo hyỹ tsimykaranaha. Katsaktsa batu ahapehatsitsa, tsipahatsumuēh̄i tsihikiknaha. Sesus harere bo hyỹ tsimykaranaha zeka ihumo ahaspirikporētsa ana humo hi tsipahatsumuēh̄ikīnaha, iwatsahi ahakurētsa tsimoziknaha.

## 2

<sup>1</sup> Iwaze kapetu kasopyk:

– Tapara Korītio ezektsa kaharere humo batu siaku iwatahi batu mysibetsakzo – icy iwatahi batu ahabo zuk.

<sup>2</sup> Kaharere humo ahasukatsihikrētsa zeka batu aty tohi pikykuwyky. Ikiahatsa pahasuka tsihikikwyky ikiahatsa zuba tsipikykuwykynaha.

<sup>3</sup> Iwatahi batu ahabo zikumu papeu humo iwatahaka, kawataha papeu humo ky zahabet-sakak:

— Ahamysapybyitsa tu tsikykaranaha tsimoewynahaktsa! — icy. Ahabo pomoze katy sukatsihikbyri zeka ba zikumu. Tsikykuwykynahaktsa kytsa! Kakurēta zeka ikiahatsa kino niwatihi ahakurētsa tsimoziknaha hỹ.

<sup>4</sup> Ahahumo kasukatsihikrēta iwatahi papeu humo ahabo iwatahaka. Ahapokzi ikpuziuku. Ahapokzi paikpa mytsaty mykara. Anapapeu humo iwatahakaze ahasukatsihik byihuja ahaspirikpowy bete pahahyrinymyryky. Ahahumo kamypokzitsiarēta tu iwahi papeu humo iwatahaka.

*Deus mymysapyhyripyrywyky.*

<sup>5</sup> Atakta ahatuk imysapybyita ziknakara ihumo batu kaku. Wastuhu ikiahatsa tuk ihumo ahasukatsihikrētsa. Niwazubaktsa! Isoho botu ahabo iwataha hawa ipe my zeka mymybetsakak iwa botu iwataha.

<sup>6</sup> Kytsa sizubarētsa ahatuk zibetsakaknaha iwatahi batu zimyizo. Niwazubaktsa.

<sup>7</sup> Abaka imysapybara ty ziknakara naha ty tsiokzohiknaha. Tsitsumuēhīnahaktsa! Atahi tisukatsihikrēta zeka tsiakuwykynahaktsa kytsa! Tisukatsihikrēta tu Deus imysapybara tu zio-kzohik. Ikiahatsa kino niwatihi tsokzonahaktsa anaharere humo tsimyspirikpo zeka ana ty tsitsumuēhīnahaktsa. Iwa zeka iaku byita mozik.

<sup>8</sup> Ibo tsipisapywykynahaze iwa ikiahatsa ihumo ahamypokzitsiukrētsa ana humo hi tsihyrinymyrēta.

<sup>9</sup> Ahabo iwatahaze – Kaharere bo hyĩ tsimaha ja. Batu kanyhy – iky. Iwaze iwatahaka. Abaka kahyrinymyrēta. Iwatatuze batu ahabo kozoreze kaharere ty papeu humo iwatahaka ana humo hi tykaranaha.

<sup>10</sup> Atakta imysapybyita ziknakara ihumo batu kaku. Ikiahatsa imysapybyita tu mykara tsiptok-zohiknaha zeka uta kino niwatihi, imysapybara ty nikara piokzohik. Kiristu okzeka imysapybara ty piokzohik. Abaka katsa batu mysukatsihik. Wasani my.

<sup>11</sup> Satanas mymysapybyiriki iwa botu mytsaty mykara, katsaktsa mysapybyitsa tu tsimykaranaha ana humo kino mymymyiwiky. Iwa myzihik zeka myhyrinymyrētsa iwatsahi batu yhyĩ tsimaha.

*Pauro Toroade eze paikpa mytsaty nikara.*

<sup>12</sup> Toroade bo ikzumuze Deus wasania ty Sesus Kiristu soho Toroade ezektsa bo iktsasoko. Hawa maku ziskezozekba buruhuwa babatu zipoba anawaha mypehatsa Kiristu zikpeha, Deus wasania ty Toroade ezektsa bo motsaso. Anaeze Deus harere piwaby tsihikiknaha iwaze Deus wasania ty kytsa bo iktsaso.

<sup>13</sup> Iwa zeka paikpa mytsaty ikykara. Titu katsy wata batu tyhobyk Toroade eze. Iwaze Toroade ekze ikparak. Masedonia bo ikukuru anaeze Titu paikpa ikziberiki.

*Kiristu izikwyrēnikita.*

<sup>14</sup> Kytsa niwatsorokonahaze aty ipaikanikita ustsya kytsa nisioktyhyryknahatsa. Isukyrytsitsa sitsipa humo nisioktyhyryknaha. Ihudikhudikwy

bo izumunahaze isukyrytsitsa iapik nisioktyhyryknaha. Sizubarētsa isukyrytsitsa bo iktsa nikaranaha. Anawahi Deus zikwy humo mypunihikrētsa tsimoziknaha, ihumo zuba katsaktsa ipaikanikita watsa tsimoziknaha. Iwatsahi kytsa sizubarētsa mybo iktsa mykaranahaze katsaktsa Kiristu tuktsa tihi hỹ ana humo hi sihyrinymyrētsa. Iwatsa nanabyitaba tsimykurunaha. Deus wasania ty tsimytsasokonaha. Wasaniha ty tsimytsasokonahaze jokmorēnikia waha my. Kytsa jokmorēnikia okmore waha iwa Deus mymypeha wasania ty jokmorēnikia waha my nanabyitaba jokmorē. Iwatsahi Deus pe:

— O Deus ikia zuba tsamysapyrēta — tsimaha.

<sup>15</sup> Tubabatu Deus wahoro zubata eze ziknapamykysokonahatsa jokmorēnikia ty zikoroko iwaze zatata tisapyrēna jobo Deus bo nido. Ana zatata waha tsizubarēna ty nu nikaranaha. Iwata katsaktsa Kiristu harere bo zuba hyỹ tsimykaranaha ana bo hi kytsa sizubarētsa iktsa mykaranaha. Asaktsa simysapybyitsa nikaranaha sihumo Deus mysiokzohik mybo iktsa maha. Utsaktsa sinini ykarawy bo mykaranaha asa kino niwatihi mybo iktsa mykaranaha. Iwa sizubarētsa mybo iktsa mykaranaha.

<sup>16</sup> Simysapybyitsa sinini ykarawy bo sisapy, katsaktsa Kiristu tuktsa sihumo zatata nihyrikosokdata hōrō wata.

Utsa simysapybyikitsa tu nikaranaha iwaze Deus mysiokzohik asa humo kino niwatihi katsa



Kiristu tuktsa zatata jokmorēnikia wa iwaze mysia-  
akuwyky. Batu aty tohi Kiristu harere kytsa bo  
mysihyrinymryziuku. Atakta Deus zikwy zuba  
ituk motsasoziuku.

<sup>17</sup> Ata zikwy hi mytuk mynapykyk iwatsahi  
Deus harere tsimytsasoziukunaha. Deus mype  
niy:

– Wasaniha ty kytsa sizubarētsa bo tytsasokon-  
ahaktsa! Kahyrikoso ahatuk mynapykyryk iwa  
kaharere tsimytsasoziunaha – niy. Katsaktsa  
kytsa humo batu mospihikbata. Utsa kytsa  
okyrysaro humo zuba Deus wasania ty mot-  
sasokonaha, katsaktsa batu. Kiristu sopyk humo  
ma tsimykaranaha iwaze iokzeka tsimytsasokon-  
aha mypubaraty tsimytsasoziukunaha.

### 3

#### *Aibaky Deus harere.*

<sup>1</sup> Asaktsa pahamyikinaha katsaktsa mahani si-  
watsabyitsa. Asahi:

– Hana bo sa papeu, haneze sa iwatahaha ikia-  
hatsa wasani ahasopyk – maha. Katsaktsa mys-  
apyrētsa ana humo hi ahahyrinymyrētsa. Papeu  
mysoho batu tsimyzihikiknaha. Ikiahatsa utsa  
kytsa bo ty moso tsipiwatahakanaha batu tsimyz-  
ihikik.

<sup>2</sup> Ikiahatsa mypapeu waha tsimaha. Kytsa  
iwatahaha pinymyrykynahaze iwaze anaharere  
humo sihyrinymyrētsa. Kytsa sizubarētsa ahabo  
iktza mykaranhaze asahi:

– O Korītio ezektsa wasani zikzurukunaha.  
Pauro wasani nisihyrinymyryky mahani tymyi

tsimysapyrēta – maha. Iwa maha ahamysapybara tsimoewynaha ana bo hi iktsa mykaranaha ana humo hi kahyrinymyrēta.

<sup>3</sup> Ikiahatsa papeu waha tsimaha. Kiristu papeu humo ziwatahaka nahawa. Utakta karata papeu wata zikpeha zuba. Atahi iharapuktsaysikwaka ty iwatahabara. Harahare ukpe humo iwatahabara. Deus hyrikoso ata humo hi zuba katsaktsa Kiristu sopykyryktsa tsimyzurukunaha, atahi ispitu mykara. Ata humo hi zuba tsimyarape pokzitsikinaha. Katsaktsa Deus wasania ty ahabo nitsasoko, ata humo hi zuba Sesus harere bo hȳ tsimykaranaha. Iwatsahi ahamysapyrētsa tsimoziknaha ana ty hi kytsa sizubarētsa bo karata waha ty.

<sup>4</sup> Deus okze myspirikporētsa. Kiristu harere bo hȳ tsimykaranhaze kino ihumo zuba myspirikporētsa tsimoziknaha, iwatsahi wasaniha tsimyt-sasoziukunaha.

<sup>5</sup> Deus myty tsumuēhī byizeka wasaniha kytsa bo ba ziktsaso. Deus zikwy humo zuba wasania ty tsimytsasokonaha.

<sup>6</sup> Ata hi tazikwy ty mybo nyny niy. Nanabyitaba izikwy humo Deus harere wasania ty tsimytsasoziukunaha. Mybarawy ezektsa bo sizubarētsa ityryktsa mozihikik iwatahi mynamytsumuēhīkī. Deus wasaniha iharere ezytyk my. Anaharere ty mybo nitsasoko. Anaharere humo wasani tsimykaranaha. Tsimyhyrikosokdanaha zeka iharere humo mywahi Deus tuk tsimynapykyknaha. Deus hyrikoso anaharere humo mymyhyrinymyryky. Deus harere, Moises bo nitsasoko ipehawy iwaze

kytsa zuba Deus tuk tawahi ba ziknapykyknaha. Kytsa tahaharere humo wasani nizihikiknaha. Batu ba. Taha bo zuba mybarapetu mykaranaha. Tahaharere humo mohyrikosokdanahaze batu tawahi Deus tuk ziknapykyknaha. Deus wasania ty zuba mykara. Ihyrikoso mytuk ana harere mymyhyrinymyryky ana humo hi zuba mysapyrētsa tsimoziknaha.

<sup>7</sup> Moises Deus harere ibyky mymyhyrinymyry hawa batu mysapy tsimaha. Anaharere haraharetsa siokpeziurētsa humo ziwatahaka. Deus imysapyrēnikita tu anaharere Moises bo nitsasokoze hawa tisapyrēna natakaha. Iwatahi Isareu tsekokatsa Moises ok bo batu iktsa zikaha. Tsioksapyrēta niyze iwatsahi kytsa ibo batu iktsa zikaha. Bykyze iok karipu karipuk ityh̄wy hana bo ja niy. Katsaktsa iharere bo batu h̄y tsimykaranaha zeka tsimyhyrikosokdanahaze Deus tuk mywahi ba ziknapykyknaha. Iharere mymyhyrinymyryky katsaktsa batu mysapy tsimaha.

<sup>8</sup> Abaka Deus hyrikoso mytuk mynapykyryk anahi wasanikia. Ihyrikoso mytuk mynapykyk atahi isapyrēnikia.

<sup>9</sup> Deus harere Moises bo nitsasoze anaharere tisapyrēna. Anaharere humo hi Deus mype niy:

– O hawaha ty tsikykaranaha batu imysapy my – nikara. Myhyrikosokdanahaze Deus tuk tahawahi ba ziknapykyknaha. Deus okzeka batu mysapy anaharere humo hi tisapyrēna. Abaka Deus harere ezytyk, wasania ty aba zubaha anaharere bo yh̄y tsimykaranaha zeka Deus okzeka mysapyrētsa tsimoziknaha.

<sup>10</sup> Tapara Deus harere Moises bo nitsasokoze tisapyrēna bo iktsa niy. Abaka Deus harere ezytyk wasania ty anaharere hi aba zuba tisapyrēnikia ty. Hawa anaharere mymyhyrinomyrykynahaze Deus okzeka mysapyrētsa tsimoziknaha iwaze anaharere ezytyk isapyrēnikia ty my.

<sup>11</sup> Iharere taparaka tisapyrēna. Deus tihi:

– Anaharere humo yh̄špyk tsimykaranaha anahi mozihikik. Bykyze kaharere ezytyk motsasoko anatyhi ahawahi yh̄š tsimykaranahaktsa kytsa! – niy. Deus wasania ty zuba isapyhababa motsasoko.

<sup>12</sup> Iwaze katsaktsa mywahi Deus tuk tsinapykyryknaha ana hi taperyky. Deus mymysapywyikik ana humo hi myhyrinomyrētsa. Iwatsahi batu mysikpyby, batu ba Deus wasania ty kytsa sizubarētsa bo tsimyzihikiknaha.

<sup>13</sup> Katsaktsa batu Moises watsa. Atahi panu ty taty harasuk ziknakara. Isareu ezektsa iok karipu karipuk humo ky ityh̄wytsa hana bo ja iwatsahi ibo batu iktsa niaha.

<sup>14</sup> Isareu ezektsa Moises sopykwy tsikaeni zuba zinomyrykynaha. Deus harere humo tsikaeni zuba sihyrinomy. Maku wata atakta panu ty taty harasuk niy. Abaka atsatu. Deus harere sihumo tsihokdaharēna iwatuze iharere taparaka zinomyrykiknaha anaharere humo batu sihyrinomyry. Kiristu zuba mysitsumuēh̄i iwaze asahi iharere bo hȳš mykaranaha zeka anaharere mypubara ty pinomyrybanaha.

<sup>15</sup> Abaka Moises sopykwy pinomyrynahaze tsikaeni zuba sihyrinomyrētsa asahi maku watsa panu ty taty harasuk harasuk sisopyk.

**16** Aty zeka:

– Sesus mypehakatsa harere bo hyĩ tsimykara kyze Deus harere ty tsinymyrybaba. Deus papeu humo: “Deus panu ty Moises harek humo ky zihaktahik” – niy. Isareu ezektsa niwatihi Deus harere bo yhy maha zeka Deus sipanu waha pihaktahik iwa iharere ty pinymyrybabanaha. Katsaktsa mysapybyitsa tu tsikykaranaha Deus mymyokzohik. Kyze amy ty panu waha ty hasruk ty Deus pihaktahik iwaze ihumo mystirikporētsa tsimoziknaha.

**17** Ana waha mypehakatsa Deus hyrikoso kino niwatihi atsatu maha. Ata humo hi meky watu tsimoziknaha iwatsahi Deus tuk mywahi tsimynapykyryknaha. Iharere humo ahapybybyihu ja! Deus okzeka ihumo mysapyrētsa tsimoziknaha. Wasani tsimykaranaha Deus wasaniha humo meky watu tsimoziknaha.

**18** Katsaktsa botu Sesus mypehakatsa harere bo hyĩ tsimykaranaha. Katsaktsa batu kytsa watsa asaktsa panu ty taharek nasihareksukuknaha. Batu ba. Mypehakatsa hyrikoso humo mysapyrētsa tsimoziknaha. Sesus wata tsimoziknaha. Katsaktsa moknywy watsa tsimaha. Kytsa mybo iktsa mahaze Sesus mypehakatsa hyrikoso mytuk pinyknaha moknywy wata. Iwatsahi mysapyrētsa tsimoziknaha pibytuhukutu Sesus wata mysapytohitsa tsimoziknaha.

**4**

*Deus isapyrēnikia ty mybo nyny my.*

<sup>1</sup> Deus mymysapywyky iwaze tarabaja humo nimypeha. Tubabatu mype niy:

– Nanabyitaba wasania ty myzubarētsa bo paikpa tynatsasokonahaktsa – niy. Iwatsahi mykurētsa. Mytarabajawy humo ba mykubyri zikzumu.

<sup>2</sup>Hawa batu mysapy kytsa papatu tsipireknaha. Hawa tsimyzurukunaha wasani tsimykaranaha iwatsahi batu mysikyby. Deus okzeka wasani tsimykaranaha ana humo hi kytsa sihyrinymyrētsa. Hawa batu imysapy tserekbainaha. Katsa ba ziksispihikbatanaha, Deus harere humo batu mysimyī. Wasaniha ty zuba tsimykaranaha. Deus harere mypubara ty zuba tsimytsasoziukunaha iwaze kytsa mysoho motsasonaha:

– O asaktsa wasani motsasokonaha siharere wasape – mykaranaha.

<sup>3</sup>Katsa Deus wasaniha humo tsiktsasoikiknaha. Anaharere kytsa bo tsihokdaharēna zeka asaktsa sinini ykarawy bo maha, sihumo hi myharere tsihokdaharēna.

<sup>4</sup>Asaktsa Satanas hyrikoso sapybara pehatsa sibo mybarapetu mykara. Atakta mybarawy ezektsa Deus wata isopyk mozihikik. Ihumo hi imysapybyikia bo zuba mytsaty mykaranaha. Asahi sihyrizikubyitsa watsa. Unata pyrik mykaranahatsa watsa. Deus wasania ty okoro eze kywa. Hawa mozurukunaha sihyrinymyrētsa batu pyik pyik zikaha. Kiristu imysapyrēnikita myhyrinymyrētsa. Deus wasania ty ana ty hi nimyhyrinymyryky. Kiristu Deus wata, wasaniha humo myhyrinymyrētsa. Asaktsa sinini ykarawy bo maha ana humo hi batu sihyrinymyry. Deus

wasaniha humo batu sihyrinomyry. Sesus harere bo hỹbyri nikaranaha iwatsahi batu sispirikpo.

<sup>5</sup> Katsaktsa mypetu ba zikaha:

– O myharere bo hyỹ tsimahaktsa! – iwa ba zikaha. Katsa hi:

– O Sesus Kiristu harere bo zuba hyỹ tsimahaktsa kytsa! Ipe: “Ikiahi aba zubata” tsimahaktsa! Iwa pykyhytutaha iharere humo zuba hyỹ tsimykaranaha – tsimaha. Katsa ja. Kiristu mymysapywyikik iwatsahi ihumo tsipahatsumuēhīnaha. Ipokzi ahatsyhyryze tarabajziu tsimykaranaha. Iwa hỹ.

<sup>6</sup> Isuknihyize iwororo babyize Deus tihi:

– Okoro tu zik – niy. Atsoko okoro yzik niy. Atahi okoroze tu waha isapyrēnikia ty mybo piwatawy. Mymyhyrinomyry. – Kamysapyrēnikita. Kapunihikrēta – anatyhi mymyhyrinomyryky. Kiristu iwata, imysapyrēnikita Deus wata, iwaze isoho humo tsinomyrykynaha. Kiristu humo tsinomyrykynaha iwatsahi Deus humo niwatihi tsinomyrykynaha.

<sup>7</sup> Katsaktsa Deus wasania ty tsiktsasoikiknaha. Deus pokzitsihity. Katsa mypunihikbyitsa tu Deus zikwy mytuk mynapykyryk, iwatsahi izikwy humo zuba wasania ty tsimynatsasoikiknaha. Katsaktsa morosuk watsa. Morosuk batu isapy batu ihudi iwatahi myboboro iwatatu amy ty ipokzitsiaty morosuk eze pok pok tsimaha. Deus iwatu nimysukni iwatahi kytsa myharere ty piwabykynahaze:

– O asaktsa batu sipunihik iwa motsasokona-haze Deus zikwy humo zuba hỹ – mykaranaha.

<sup>8</sup> Kytsa mymyknikinahaze Sesus mymytsumuēhĩ. Paikpa mytsaty tsimykarannahaze Sesus humo tsimyspirikpokonaha.

<sup>9</sup> Mysukyrytsitsa sizubarētsa. Myharerezi-uwytsa kino niwatihi sizubarētsa. Mysukyrytsitsa mymysukyryikknaha iwatsatu Deus ba zikmyrek.

<sup>10</sup> Pibiyituhukutu mysukyrytsitsa mymyba tsihikiknaha iwaze katsakta:

– Sesus sukyrytsitsa zibezenaha anawahi mymybanaha – tsimaha. Sesus izikwy hi mytuk mynapykyk ana kino kytsa sizubarētsa mymytsatyknaha.

<sup>11</sup> Kytsa Sesus harere bo batu hỹ mykaranaha asakta mymyba tsihikiknahaze Deus mype:

– Ahasukyrytsitsa pahamyitsapyriwyknaha zeka kahyrikoso ahatur mynapykyryk ihumo ahapunihikrētsa tsimoziknaha – niy. Iwatsahi kytsa sizubarētsa hi:

– O asakta Deus zikwy humo zuba sipunihikrētsa, ihyrikoso situk mynapykyryk – mykaranaha.

<sup>12</sup> Sesus Kiristu harere tsimytsasokonahaze asakta Sesus harere bo yhỹ ahabyitsa tu mymyba tsihikiknaha. Ikiyahatsa myharere bo yhỹ tsimykarannahaze hỹ iwaze tsimyhyrikosokdanaha zeka Deus tuk ahawahi tsinapykyknaha. Katsa sinini tsimykarannahaze iwatsahi ikiahatsa Deus tuk ahawahi tsinapykyknaha.

<sup>13</sup> Tubabatu Deus harere papeu humo ziwataha:

– Deus harere humo hyỹ ikykara iwatahi iharere soho iktsasoko – niy. Katsa niwatihi Deus



harere bo hyĩ tsimykaranaha iwatsahi iharere kytsa bo tsimytsasokonaha.

<sup>14</sup> Sesus Kiristu nihyrikosokdaze Deus hi zihyrizikpowy. Katsa niwatihi tsimyhyrikosokdanaha zeka Deus mynamyhyrizikpowy Kiristu wata. Katsaktsa ituk mywahi tsimynapykyknaha. Ikiahatsa kino niwatihi ituk ahawahi tsimynapykyknaha. Deus bo mymyoktyhyryk anaeze mywahi tsimynapykyknaha hỹ. Ana humo hi myhyrinymyrẽtsa tuze Deus wasania ty tsimyt-sasoikiknaha.

<sup>15</sup> Katsaktsa Deus harere ahabo tsiktsasokonahaze sinini tsikykaranaha. Ana bo hi iktsa tsikykaranaha. Iwatsahi Deus pahasapywyky iwatsahi sizubarẽtsa ahatuk Deus tyryktsa moziknaha. Iwaze kytsa sizubarẽtsa Deus bo nipamykysokonaha:

— O Deus myzo ikia zuba amysapyrẽnikita. Mybo tsipisapywyky iwatsahi katsaktsa ahumo ka mykurẽtsa — tsimykaranaha. Iwaze kytsa sizubarẽtsa Deus zuba imysapyrẽnikita sihyrinymyrẽtsa hỹ.

*Sesus humo sispirikporẽtsa.*

<sup>16</sup> Iwatsahi batu mysukatsihik. Mynury humo batu mypaik tsimytsaikbanaha katsaktsa mypunihikrẽtsa tsimoziknaha hỹ. Deus hyrikoso mytukze iwaze Sesus harere humo zuba tsimyspirikpokonaha. Myzibytuhukutu izikwy humo meky watu tsimoziknaha.

<sup>17</sup> Asaktsa Sesus harere bo yhỹ ahabyitsa mymyknikinaha. Pahamyitsapyriwykynaha aibani simysapybyitsa tu nikaranaha nepyknaha. Ana humo hi sininispyk tynakaranaha. Bykyzehu

Deus mybo pisapywyky. Katsaktsa iwa tsimoziknaha mysapyrētsa hỹ. Niwazubaktsa! Ana kino tawahi tsimynapykyknaha hỹ.

<sup>18</sup> Iwatsahi hawa ha ty iktsaziu tsimykaranaha ana soho bo mytsaty mytsaty byitaha. Aibani mynapyk mopyk naha bo ka mytsaty mytsaty byitaha. Zikozonahabara bo hi mytsaty tsimykaranaha. Hawa Deus tuk mywahi tsimynapykyryknaha ana soho humo hi mytsaty tsimykaranaha. Amy bo iktsa tsimykaranaha bykyze hana bo ja. Amy bo batu iktsa tsimaha atsatu tawahi mynapykyk. Iwa hỹ.

## 5

<sup>1</sup> Mynury myparik waha. Kaparik eze mopykyrykspek bykyze mopykbaik iwahatu aba zuba atatu tsimaha, bykyze tsimyhyrikosokdanahaze mynury mobibiba. Tsimyhyrikosokdanahaze mynury wytyk eze tu motare. Deus hi ustsā nury ezytyk mysisukni mytsyhyryze pikymy. Bijoikpe eze mynury ezytyk mozokni anaka mywahoro waha tahawahi mynapykyknaha.

<sup>2</sup> Abaka mynury ezytyk humo botu myhyrizikbarētsa. Iwatsahi mynury bijoikpe eze tu tapyky. Ana hi tsimyzihihiknaha.

<sup>3</sup> Anaeze bijoikpe eze tu mysuk wa tsimynapykyknaha. Mynury ezytyk mysuk wata maha.

<sup>4</sup> Katsaktsa mybarawy ezektsa sinini tsimykaranaha. Mytsapyrētsa tsimaha. Kytsa tahaparik eze tu watsa, katsaktsa mynury eze tu tsimaha. Myhyrikosokdabyize mynury ezytyk zuba tsimyzihihiknaha hỹ. Deus mynury ezytyk ty mybo nyny myze mywahi ituk

tsimynapykyknaha, ba zikyrikosokdazonaha iwa tsimyzurukunaha.

<sup>5</sup> Deus hi mekywaha botu mymysapy naha humo hi nimysukni, ihyrikoso mytuk mynapykyryk ana kino mozihihikik. Iwaze Deus usa nury ezytyk myhumo mokymy mytuk mynapykyryk ana hi tsipinymyrykynaha.

<sup>6</sup> Iwatsahi mypunihikrētsa. Mybarawy eze tuze mynury tuk mypehatsa metutu tsimaha. Aibani zuba mywahi ituk tsinapykyryknaha ana humo hi mykurētsa.

<sup>7</sup> Iharere bo hyĩ tsimykaranaha iwatsahi ana hi taperyky. Ana humo hi batu iktsa tsimaha iharere bo hyĩ tsimykaranaha zuba. Sesus sopyk ty tsimyzurukunaha iwatsahi ihumo myspirikporētsa tsimoziknaha.

<sup>8</sup> Iwatsahi mykurētsa. Hawa ituk mywahi tsinapykyknaha mytsaty tsimykaranahaze hi mykurētsa. Iwatsahi mynury tahaerek tsihikik.

<sup>9</sup> Amy ty aba zubaha Sesus myhumo tsakurēta mozik. Katsaktsa mynury suk eze tu myhumo tsakurēta tsimyzihikiknaha. Katsaktsa ituk mywahi tsinapykyknahaze myhumo tsakurēta mozik, iwa tsimyzihikiknaha.

<sup>10</sup> Myzubarētsa Kiristu okeryk tsinamykahanaha. Hawa tsikykaranaha humo motsaso. Kiristu simysapyrētsa pe my: – Ikiahatsa mybarawy eze tuze tsikzisapykynaha hỹ. Iwaze isapyrēnikia ty ahahuak ty ahabo nyny – my. Kyze simysapybyitsa pe:

– Ikiahatsa mybarawy eze tuze ahamysapybyitsa tsikykaranaha. Iwa imysapybyiha ty ahabo

ahahuak ty nyny my pahasininiwyky – my. Iwa hỹ.

*Hawa Deus harereziuwytša tsimoziknaha.*

<sup>11</sup> Kyze mypehatsa Sesus Kiristu tsazuba nakarata humo myhyrinymyrētsa, ihumo ma tsimykaranaha zuba, ipokzi batu mysukatsihik. Atahi myhuak ty mybo nyny my mytsaty tsimykaranaha. Iwahatu itsyhyryze tarabajaziu tsimykaranaha. Deus wasania ty Sesus soho tsimytsasokonaha iwaze kytsa iharere bo hyỹ mykaranaha. Tsimytsasokonahaze wasape mysopyk, wasaniha zuba kytsa mysihyrinymyrykynaha, Deus ana humo kino zinymyry. Ikiyahatsa myhumo tsinymyrybabanaha.

<sup>12</sup> Ikiyahatsa mysoho humo batu mymybete-sazo. Ahape batu tysozo. – Katsa tsipahasapy-wykykynaha iwatsahi mybo hyỹ tsimykaranahak-tša! – my. Iwa batu tyso. Ikiyahatsa myhumo ahakurētsa ana hi tsimyzihikiknaha. Wastuhu kytsa ahabo zumunaha asaktsa mymysapybyrik-inahatsitsa. Siokzeka simysapyrētsa watsa maha amy ty ape bo zuba iktsa sisopyk. Asaktsa mekt-satu maha batu sisopyksapy. Hawa tsimyzuruku-naha wasani my, ana soho humo hi tsimymybetesanaha.

<sup>13</sup> Tozeka ja katsaktsa ahaokze ka mytyrykmy-itsa watsa. Katsaktsa Sesus pokzi tarabajaziu tsikykaranaha ana humo hi ahaokze ka mytyryk-myitsa mytsaty tsimykaranaha. Zimyinahaby-itsa tu zeka tsipahatsumuēhĩnaha ana humo hi

tsimyzurukunaha ana kino tsipinymyrykynaha iwaze ahatsyhyryze tarabajaziu tsimykaranaha.

<sup>14</sup> Kiristu myhumo tsimypokzitsiarēta. Anaty kino kytsa sizubarētsa tsysitsumuēhīnaha. Mytsatyziu tsimaha zeka maku estuba zuba mybarawy ezektsa sapyzekenihyrikosokda. Iwatsahi mybarawy ezektsa Sesus tuk tsimyhryrikosokdanaha.

<sup>15</sup> Mysapyzekenihyrikosokda iwatsahi hawa ha tsimyzihikiknaha batu hỹ tsimykaranahaze. Niwazuba mysapyzekenihyrikosokda iwatsahi ana hi mozihikik ana bo hi hỹ tsimykaranaha. Atahi mysapyzekenihyrikosokda iwatahi ana hi mozi-hikik ana bo hi hỹ tsimykaranaha iwa tsimyzurukunaha.

<sup>16</sup> Abaka mybarawy ezektsa watsa batu mytsaty tsimykaranaha. Mypetu mysopyk:

– O atakta tsimysapyrēta wata – tsimaha.

– O ustakta imysapybyita wata my – iwa mytsaty byitaha! Tapara Kiristu soho nawa mytsaty tsikykaranaha abaka batu. Tsiziakbatanaha zuba zeka Kiristu mymyhryrinymyryky. Sesus Kiristu humo myspirikporētsa tuze kytsa ezytyk watsa tsimoziknaha.

<sup>17</sup> Kiristu tuk tsinapykyknahaze meky watu tsimoziknaha. Deus mymysuknizo tawa iwatsahi ihumo meky watu tsimoziknaha. Hawa tapara tsikzurukunaha batu imysapy abaka mahani. Iwaha hi nepykbaik katsa meky watu tsimoziknaha.

<sup>18</sup> Iwatsahi meky watu tsikyziknaha. Deus humo zuba katsa meky watu tsimoziknaha, Deus hi nimysuknizo Kiristu mysapyzekenihyrikosokda.

nihyrikosokda naha humo katsaktsa meky watu tsimoziknaha. Tubabatu katsaktsa Deus humo batu mykparawy taparaka ihumo tsikmykyrikinaha. Abaka mahani. Ata humo hi abaka ahaharereziuwu tsimoziknaha iwaze Deus mype niy:

– Utsa kytsa boktsa! – tsimaha. – Kytsa bo tsimytsasonaha kahumo hi kaharereziuwu moziknaha, ahaokani byihuja tsimaha – Deus niy.

<sup>19</sup> Kytsa sizubarētsa simysapybyitsa ty nikaranaha ana soho Deus bo ka batu mytsaty nikara. Kytsa simysapybyitsa ty nikaranaha Kiristu sisapyzesty nihyrikosokda. Kiristu nihyrikosokdaze simysapybyitsa tu nikaranaha sihuak ziaксе. Iwatsahi ispe tsimaha:

– Sesus harere humo hyỹ tsimykaranaha zeka Deus harereziuwytса tsimoziknaha. Kiristu ahasapyzesty nihyrikosokda iwaze Deus ahamysapybyitsa tsikykaranaha ihumo zahaokzo – tsimaha. Sesus Kiristu mypehakatsa, iwatsahi iharere kytsa bo tsimytsasonaha.

<sup>20</sup> Iwatsahi Deus ykzohotsa tsimaha. Deus harere zuba ahabo tsimytsasonaha. Katsa hi:

– Deus harereziuwytса tsimoziknaha ana hi mozihikik. Deus myzo ahasopyktsa – tsimaha. Deus hi mybarawy eze tu zeka atsatu ahabo mot-sasoko, katsaktsa iakzohotsa tsimaha.

<sup>21</sup> Kiristu batu imyi ana humo hi ahahyrinymyrētsa. Katsa mysapybara ty ana hi Kiristu ziaксеhyryk niy. Nihyrikosokdaze mysapybara huak ty ziaксе niy. Iwaze mysapybyitsa ty tsikykaranaha Deus

mymyokzohik abaka hana bo ja. Iwatsahi katsaktsa Kiristu tuk tsimyzurukunaha zeka isopyk watu tsimykaranaha iwatsahi Deus okzeka mysapyrētsa tsimoziknaha. Katsa meky watu tsimoziknaha. Iwa hỹ.

## 6

<sup>1</sup> Kyze katsaktsa Deus tuk tarabajaziu tsimykaranaha iwaze mypehawy hi:

– Tapara Deus zahasapywyky, isapyrēnikia ty ahabo nyny niy ana humo kino ahaspiriktsokdaha byihuja! Deus harere bo hyỹ tahaktsa iwatsahi isapyrēnikia ty arek arek byitaha ja! – tsikaha.

<sup>2</sup> Deus harere tsiwabytoktonaha! Deus hi:

– Zahasapywy tsihikikze amy kabo tsikzapykykynaha botu iwaby.

Ikiyahatsa kabo ahasapybyitsa tsikykaranaha katse humo pahaokzohik.

Iwa zahatsumuēhĩ tsihikik – niy.

Abaka Deus pahasapywy tsihikik, abaka pahatsumuēhĩ tsihikik.

<sup>3</sup> Wasani tsimyzurukunaha iwatsahi kytsa Sesus harere bo hyỹ mozhikiknaha. Hawa batu imysapy tsimykaranaha zeka kytsa tihi:

– O Deus tsumuēhĩtsitsa batu wasani mykaranaha iwatsahi katsaktsa Sesus harere bo batu hỹ zikaha – mykaranaha. Nawa kytsa mysoho ba ziktsasonaha, batu zikaha, wasani tsimykaranaha.

<sup>4</sup> Katsa hi Deus tsumuēhĩtsitsa tsimaha, ana kino ustsas bo tawatawykynaha. Asaktsa Sesus harere bo hyỹ ahabyitsa tu mymyknikinaha. Katsaktsa

sihumo mykubyrisorokrētsa. Mymysukyryikik-naha, mykubyritywy kino niwatihi iwatsa tu mykubyrisorokrētsa.

<sup>5</sup> Asahi nimykinaha nymyhuruknaha. Katsa tsiknazuzuknahaze nimysapybyrikinaha. Nymyhudizukunaha. Deus humo tsizubarēna ty tarabaja ba zikpyk, myrapa tsiykyknaha, mytutsa tsiykyknaha iwa tsikzurukunaha.

<sup>6</sup> Iwaze ustsā kytsa mysoho zinymyrykynaha. Katsaktsa Deus tsumuēhītsitsa sihyrinymyrētsa. Wasani tsimyzurukunaha ana humo hi katsa Deus tsumuēhītsa zinymyrykynaha. Mysapyrētsa. Deus harere humo myhyrinymyrētsa iwatsahi iharere tsimytsasoziukunaha. Mykubyrisorokrētsa. Mysopykziurētsa. Deus hyrikoso mytuk mynapykyryk iwatsahi kytsa tsiksisapywykynaha. Tsiksipehapokzitsikinaha.

<sup>7</sup> Deus harere zuba tsimytsasoziukunaha, Deus zikwy mytuk mynapykyryk. Wasani tsimyzurukunahatsa hi ana humo mybototsa watsa tsimaha. Mybototsa ty papyk papyk tsimaha mymybetesawy naha ziktsa watsa namybetesakanaha. Kytsa Sesus bo hyĩ ahabyitsa tu myhumo natahakyrikinaha. Mysapyrētsa tu Deus hyrikoso humo iwaze batu myharerewabymybara batu zikaha.

<sup>8</sup> Wastuhu kytsa mysoho humo siharereziurētsa. Ustsaktsa batu, mysoho humo batu siharereziu mymysapybyrikinaha. Mektsatu kytsa tihi:

- O Pauro tuktsa simysapyrētsa – maha. Ustsā:
- O Pauro tuktsa batu mykparawy – maha. Iwa my. Katsaktsa wasani tsimykarannahaze batu isty



myi, amy ty wasanikia ty zuba tsimytsasokonaha. Iwaze kytsa mysoho – asaktsa sispihikbatakatsa – maha.

<sup>9</sup> Kytsa nyhybyitsa watsa sisopyk. Utsaktsa mynyhytsa tihi hỹ maha. Wastuhu kytsa:

– Pauro tuktsa botu niakbabanaha – maha. Katsaktsa myspitu tsimaha. Kytsa mymyzuhunahaze ba zikmybanaha.

<sup>10</sup> Kytsa ziknamykubyikinaha iwatsatu Deus humo mykurētsa tsimynapykyknaha. Kytsa tihi – asaktsa sinamybyitsa – maha. Katsaktsa Deus wasania ty tsimytsasokonahaze isapyrēnikia ty kytsa bo nyny tsimykaranaha, ikiahatsa niwathiktsa ana harere humo hi sinamyrētsa watsa moziknaha. Kytsa okzeka mynamybyitsa watsa iwatsatu Deus okze mynamyrētsa watsa imysapyrēnikia ty mybo nyny niy.

<sup>11</sup> – O Korītio ezektsa myharereziuwysitsa ahahumo tsimypokzitsiukrētsa. Myharere ahabo batu iokdaha myharere mypubara. Hawa mytsaty tsimykaranaha ana kino ahabo tsimytsasokonaha ikiahatsa mykparawysa.

<sup>12</sup> Tsipahasapywykynaha ana hi tsimyzihikiknaha. Ikiahatsa ja. Myhumo hỹbyri tsimykaranaha.

<sup>13</sup> Ahabo tsimytsasokonahaze myhyrytsa pe maha wa tsinakaranaha. Ikiahatsa mybo aha humo kyty tsiwatawynaha. Myhumo ahakrybyihu ja – tsimaha.

*Pauro Korītio ezektsa bo nisisukpe.*

<sup>14</sup> Ikiahatsa kytsa Sesus harere bo hỹ ahabyitsa tu ka pāo pāo byitaha. Kytsa simysapybyitsa mykaranahatsa ba situk mynapykyknaha.

Aty zeka okoroze pitabaka taske humo tsihyrynymyrēta. Aty zeka unata eze pitabaka pyrik pyrik mykara iwatsahi ituktsa batu zikaha. Asaktsa ahatuktsabyitsa. Iwatatu ikiahatsa Sesus tuktsa Sesus harere bo hȳ zikahabyitsa tu ba situk tsinapykyryknaha. Batu ahamykpyriziu.

<sup>15</sup> Kiristu Satanas ahatsa batu harape tuk zikaha. Iwatsa Sesus tuktsa Satanas tuktsa meky watu maha. Hawa Sesus tuktsa mytsaty mykaranaha hawa Satanas tuktsa mytsaty mykaranaha meky watu mykaranaha. Batu atsatu mytsaty zikaha. Iwatsahi batu simykpyriziu. Iwa h̄y.

<sup>16</sup> Deus wahoro zubata deusbyitsa wahoro mekywaha tu maha. Katsaktsa Sesus harere bo hȳ tsimykaranahaze Deus wahoro wata tsimaha. Deus hyrikoso mytuk mynapykyryk iwaze Deus hi:

– Utakta situk mynapykyryk. Kape: “O Deus ikia zuba myzo” maha.

Ikiyahatsa hi katyryktsa ispe my – niy.

<sup>17</sup> Iwatsahi mypehatsa tihi niy:

– Sispirikpobyitsa ty ka arekiktahaktsa!

Hawa mysopyksapy byizeka tahaerekiknahaktsa!

Imysapybara tsiperekiknaha zeka kabo pahaoktyhyryk h̄y.

<sup>18</sup> Utahi ahazo mozik.

Ikiyahatsa kahyrytsa tsimoziknaha.

Kahyrytsa kahyryza ahape my – niy.

Iwa Deus nikara atahi izikwyrēnikita my ba hawa tohi zikzukninaha.

## 7

<sup>1</sup> — O myharereziuwytša ahamumo kamypokzitsiarēta. Deus mymysapywyky isapyrēnikia mybo pinyny tsihikik my ana tyhi Deus mybo mot-sasoko. Iwatsahi hawa ha ty mysapybyitsa tsimykarana ty ka tymoewytahaktsa! Isopyksapybara humo mytsaty mytsaty byitaha! Iwa tsimykarana zeka Deus hi mysapyrētsa mymysukni. Iwaze hawa ha ty Deus batu iakparawy ipokzi batu tsimykarana. Iwaze isoho zuba mytsaty tsimykarana — my.

*Pauro tsakurēta mopykyryk.*

<sup>2</sup> O kytsa myhumo ahamypokzitsihuktsa! Katsaktsa tsipahapokzitsikinaha hỹ. Katsaktsa batu aty tohi tymyi. Katsaktsa batu aty tohi humo myharerewabytsihik. Katsaktsa ahatukze batu mybarapetu aha. Mynamy humo zuba batu mybarapetu tsikykarana, aha humo wasani mysopyk.

<sup>3</sup> Ana tyhi batu tyso iwaha ty ahamysapybyi humo. — O ikiahatsa kaokzeka batu ahamysapy — my. Ana ty hi batu mysopyk. Botu ahabo iksaso hawa ahamumo mypokzitsirētsa, mywahi ahamumo mypokzitsirētsa tsimaha. Abaka ahamumo mypokzitsirētsa, tsimyhyrikosokdana-haze kino iwa hỹ ahamumo mypokzitsirētsa.

<sup>4</sup> Utakta ahamumo kakurēta myspihikbatabyitsa tu tsimaha. Utsa kytsa bo pahaharereziuwytšy. Kytsa mymsininiwykynahaze ahasoho bo mytsaty tsimykarana, iwaze tsimyziakuwynaha. Ahamumo hi kakurēta.

<sup>5</sup> Masedonia bo tsikzumunahaze batu myty byry. Kytsa sizubarētsa nahape myijakanaha ana

soho meky watu tsihokdaharēna. Mypybyrētsa tsikykarana.

<sup>6</sup> Deus siakubyitsa mysiakuwyky mozihihik iwa mybo niy. Titu zumuze Deus ihumo mymykuwyky.

<sup>7</sup> Zumuze atahi:

– O Korītio ezektsa kahumo simypokz-itsiukrētsa hỹ. “O Pauro humo katsa myhyrizikbarētsa mybo mynakozore tawata” nikaranaha. Atakta imysapybara ty nikara, isoho humo batu siaku, ihumo sisukatsihikrētsa mykarana “O Pauro pehawy wasani” nikaranaha – niy. Iwa Titu mybo nipamykysoko. Hawa Korītio ezektsa pikbetesa tsihikiknaha iwatahi kakurēta babata mopykyryk. Iwa Deus nimykuwyky.

<sup>8</sup> Iwaze kapapeu humo zahabetsakak ahaku by-itsa tu tsikypykyknahatsa tu iwaze ahasukatsihikrētsa tsikaha. Ana kino ziwatahaka wasani niy. Kapapeu humo batu ahaku wasani niy. Tapara kapetu ikykara:

– Anapapeu iwatahaka Korītio ezektsa iksibetsakak wasani ja – iwa kapetu kasopyk.

<sup>9</sup> Kawatahaha humo ahasukatsihikrētsa ana humo hi wasani my. Kawatahaha tsinymyrynahaze ahamysapybyitsa tsikykarana tsmoewy tsihikiknaha ana humo hi kakurēta. Deus hi zahaokzohik ahamysapybyitsa tsikykarana humo batu ahaku tsikyziknaha abaka ahamysapybyitsa tsimykaranaha. Tsmoewybaiknaha. Iwatahi kawatahaha ty ahabo ikzinynyre wasani, abaka kaharere humo batu ahamyi iwatahi ahasapywyky.

10 Jokboha ahakubyitsa tu tsikykaranaha iwatsahi mysapybyitsa tsikykaranaha tamoewybaik, iwaze Deus zikwy humo meky watu tsimoziknaha. Ahasapyrētsa tsimoziknaha. Ahakurētsa. Asaktsa Deus humo batu siakparawy asahi pisuka tsihiknaha zeka simysapybyitsa nikaranaha ba ziksimoewynaha. Myhyrikosokdanahaze Deus tuk ba tahawahi ziknapykyryknaha asaktsa sinini ykarawy bo maha.

11 Ahasukatsihikrētsa tsikykaranaha. Ahakubyrize Deus isapyrēnikia ty ahabo nyny niy. Ana bohi mytsaty tahaktsa kytsa! Iwatsahi kytsa wasani tsimoziknaha. Mybo batu ahaharere ty harapubetehe tsikykaranaha. Kawatahaha humo nepykba tsinymyrykynahaze tsikpybynaha! Atakta ahatuk imysapybyita tu nikara ihumo tsikahakyrikinaha iwaze ikiahatsa ipe: nabo pãoty tsikaha. Iwaze ahatuk zuba tsikpamyksokonaha:

— Hawa ja tsikykaranaha wasani ja. Tybyi zuba tsimaha ja. Pauro mytuk tsimyzihihiknaha iwa mymytsumuēhĩ — tsimykaranaha. Hawa tsikykaranaha wasani. Kytsa sizubarētsa ahasoho humo sispirikporētsa maha nikaranaha.

12 Iwatahi tubabatu ahabo iwatahaka. Atakta ahatuk imysapybyita tu nikara awatu mahakta iwa ahabo ity wataha. Atakta sinini niyze zikyrinymyryky ana humo hi ahabo batu ity wataha. Deus okzeka kaharere bo hyÿ tsimykaranaha, kytsa bo mypubara ty mykaranaha ana hi iwatahaka hawa myhumo ahamypokzitsirētsa, ana humo hi ahabo iwatahaka ana hi tsinymyrynaha.

13 Iwatsahi katsa mykurētsa hỹ.

Abaka myhyrinymyrētsa. Ikiahatsa myhumo tsimypokzitsirētsa ana hi tsinymyrykynaha. Titu mybo zumuze atahi:

— O Korītio ezektsa zikpokzitsikinaha — niy. Wasaniha humo mykurētsa.

14 Tubabatu Titu ahabo asiba niparakze uta ipe iky:

— O Korītio ezektsa simysapyrētsa ahumo wasani maha papokzitsikinaha hỹ — iky. Kaharere wasani my. Ihumo tsimypokzitsikinaha ahasoho pe batu mybarapetu ikykara. Iwa ha ty wasani tsikykaranaha.

15 Titu hi:

— O Korītio ezektsa kaharere bo hyỹ nikaranaha. Ziksumuēhĩkĩnaha kahumo simyharerewabyrētsa — niy. Iwatahi aahumo tsimypokzitsiarēta.

16 — O kytsa aahumo kakurēta hỹ, hawa tsimytsasokonaha atsatu tsimykaranaha iwaze aahumo kakurēta hỹ — my.

## 8

### *Sesus tuktsa simykubiyhurētsa niyziknaha.*

1 O katukytsa Masedonia ezektsa asaktsa izumubanahaze Deus harere piwabynaha Deus nisapywyky iwatsahi simykubiyhurētsa niyziknaha, ana soho hi tsinymryrynahaktsa.

2 Sinini nikaranaha. Sinamybyitsa nikaranaha. Iwatsatu ustsa sinamybyitsa bo nynytohi nikaranaha. Sibony nyny nikaranahaze sakurētsa.

<sup>3</sup> Ana humo hi kahyrinymyrēta. Utsa kytsa bo zibiakaknaha. Uta batu isty peha nyny mykaranaha asa tu nyny nikaranaha.

<sup>4</sup> Asahi:

– O mynamy ty myokyrysaro ty iwa ahabo nyny tsimykaranaha. Sudeja ezektsa Sesus harere bo hỹ mykaranaha asa bo hi nyny tsimykaranaha. Myokyrysaro ty mytsyhyryze wabehyryk tsimaha – nikaranaha. Iwa tsizubarēna nitsasokonaha.

<sup>5</sup> Katsaktsa mypetu mysopyk:

– O asaktsa tsikaeni zuba nyny mykaranaha – mytsaty ahabyitsa tsikykaranaha. Tsizubarēna nyny nikaranaha. Taparaka tawaha ty Deus bo nyny niaha iharere bo zuba hỹ nizihikiknaha, iwaze myharere bo kino niwatihi hỹ nikaranaha.

<sup>6</sup> Ana ty kino katsaktsa Titu pe:

– O Korītio bo tynakozorekta – tsikaha. Titu zahatsumuēhī. Ahape niy:

– Ahaokyrysaro ty sinamybyitsa bo nyny tahaktsa! Iwa tsipisapywykynaha – niy. – Iwaze Korītio ezektsa bo tsimy. Tysiakuwykyktsa – iky. Hỹ niy.

<sup>7</sup> Ikiatsa ahanamyrētsa watsa tsinakaranaha. Sesus humo ahaspirikporētsa h̃y. Deus wasania ty tsimytsasoziukunaha. Tsahyrinymyrētsa babatsa tsimaha. Utsa tsimysitsumuēhīkīnaha h̃y. Myhumo ahamypokzitsirētsa tsimaha. Iwaze uta ahape my: – Sinamybyitsa bo ahanamy ty nyny tahaktsa! Utsa kytsa sinamybyitsa bo nyny maha, ikiaatsa hi ahanamy tsizubarēna ty nyny tahaktsa kytsa sinamybyitsa bo! – my.

<sup>8</sup> Ahabo motsasoko kahumo batu ahaty ykzo. Batu kaharere humo ahanamy ty nyny

tsimaha. Masedonia ezektsa tsizubarēna ty nyny niaha. — Ikiatsa tihi! — iwa tsimykarana zeka myhumo ahamypokzitsirētsa babatsa tsipiwatawykynaha.

<sup>9</sup> Ikiatsa botu mypehakatsa Sesus Kiristu soho bo mytsatyziu tahaktsa! Myhumo tsimypokzitsiarēta hi atakta Deus tuk bijoikpe eze tuze tsinamyrēta hỹ. Iwatatuze mybarawy bo izumuze inamybyita niyzik mypokzihi ninamybyiri. Iwaze hi katsa ihumo mykurētsa tsimoziknaha, sinamyrētsa watsa.

<sup>10</sup> Kapehawy ty ahabo my. Jatukta omoro eze ikiahsa tihi:

— O sinamybyitsa tsyhyryze myokyrysaro tsiperykynahaktsa! — ahatuk tsikpamykysokonaha. Taparaka ikiahsa tsikzihikiknaha iwaze atsatu tsikykarana Sudeja ezektsa tsiksitsumuēhīnaha.

<sup>11</sup> Iwatsahi tybyizubatahaktsa! Sinamybyitsa tysitsumuēhīzonahaktsa kytsa! Batu mytsaty tsimaha:

— O myokyrysaro ty tsizubarēna mozik zeka iwaze sinamybyitsa tsyhyryze taperyky — iwa ba mytsaty tsimaha. Abaka ahaokyrysaro ty tsimaha ana kino sinamybyitsa bo nyny tsimaha.

<sup>12</sup> Ahakurētsaktsa! Katsaktsa myokyrysaro ty nyny tsimyzihikiknaha zeka ana kino Deus okze wasani my. Myokyrysaro tsikaeni zuba tsimaha zeka iwaze ustsā bo tsipinynynaha zeka ana kino Deus okzeka wasani my. Iwatahi aty nyny myzeka Deus hỹ my. Mybaze byizeka Deus batu mype ziky:



– Ustsā bo tsipinyny tsihikiknaha zeka ana kino kaokze wasani – my.

<sup>13-14</sup> Ahanamybyitsa tsimoziknaha zeka batu mozihikik. Abaka ikiahatsa ahanamy tsizubarēna tsikaha asaktsa batu sinamy. Iwatsahi ahanamy sibo tsibiaknaha zeka wasani. Bykyzehu tozeka ja ikiahatsa ahanamybyitsa tsimoziknaha iwaze ahabo pibiakaknaha. Iwaze batu aty tohi inamybyita. Batu aty tohi inamyrēta. Ikiahatsa aharape watu tsimoziknaha ahatuk tsipibiakaknaha.

<sup>15</sup> Deus harere papeu humo iwataha:

– Aty disahawy tsizubarēna zeka ba are ziky.

Aty zeka disahawy jokboha zuba atakta batu irapa – niy.

Iwa Deus watahaha nitsaso kytsa soho asahi pibiakaknaha.

*Titu iwaze ituktsa ahatsa hawa mykaranaha.*

<sup>16</sup> Iwaze Titu kawata my. Atahi niwatihi pahatsumuēhī tsihikik iwaze utakta Deus pe:

– O myzo ikia zuba amysapyrēnikita. Ikia humo Titu Korītio ezektsa mysitsumuēhī tsihikik iwatahi kakurēta – mykara.

<sup>17</sup> Titu kaharere bo piwabyziuku hawa ha ty ibo nizapykyky ana hi hyŷ niy. Atahi:

– Utakta Korītio ezektsa bo mynakozore tsihikik – niy.

<sup>18</sup> Ituk hi usta mytuky tapehaka nanabyitaba. Deus wasania ty natsasokoro myzubaha bo. Sesus tuktsa sizubarētsa isoho tihi:

– O ata hi tsiwaby tsihikiknaha – maha.

<sup>19</sup> Sesus tuktsa mytukta tu ziwatawynaha, Serusarēhe bo tsikukurunahaze mytukta

ziwatawynaha. Ahaokyrysaro ty wabehyryk tsimaha ana kino sinamybyitsa bo nyny tsimahaze:

— Katsa ahahumo mypokzitsirētsa — sihyrinymyrētsa. Asaktsa Deus pe niaha:

— O Deus myzo ikia zuba tsamysapyrēta — maha. Ahanamy ty sibō tsipibiakaknaħa humo tynamypehapokzitsikinaha iwatsahi Deus bo inapamykysokonaha.

<sup>20</sup> Okyrysaro tsizubarēna Serusarēhe ezektsa bo wabehyryk tsimaha. Hana wa sinamybyitsa bo okyrysaro ty nyny nyny tsimaha ana hi wasani tsimykaranaħa, iwa zeka hawa okyrysaro ty kytsa bo nyny tsimaha pykyhytu tsimaha.

<sup>21</sup> Hawa Deus okzeka wasaniħa bo zuba mytsaty tsimyziħikiknaħa. Deus okze ka wasani tsimykaranaħa ikiaħatsa okze kino niwatiħi wasani tsimyziħikiknaħa.

<sup>22</sup> Iwatsahi usta Sesus tukta katsy piakzohik. Tapara hawa tsihokdahaħēna nikaraze kytsa nisitsumuēħikī ana ty hi myhyrinymyrētsa. Ahahumo tispirikporēta iwaze tiħi:

— O Korītio ezektsa okyrysaro ty sinamybyitsa bo nyny maha ana humo hi kaħyrinymyrēta — mykara. Aħabo mynakozore tsiħikik. Iwa ħy. Kytsa harakykbyitsa aħabo mysiakzoko.

<sup>23</sup> Titu katukta pahatsumuēħikī. Utsa Sesus tuktsa petoktsa ituk mokurunaha. Sesus harere bo ħy ħisopyktsa asaħi siwatawyħytsa niaħa. Kiristu bo mosakibazikiknaħa.

<sup>24</sup> Kyze aħabo mozumunaħaze tysipokzitsikinaħaktsa kytsa! Iwatsahi Sesus tuktsa sizubarētsa Korītio ezektsa soħo humo maha:

– O asaktsa kytsa humo mysipokzitsikinaha hỹ  
 – mykaranaha. Iwaze myharere ahasoho wasani  
 my sihyrinymyrētsa.

## 9

*Korītio ezektsa siokyrysaro ty Sesus tuktsa  
 Sudeja ezektsa bo nyny niaha.*

<sup>1</sup> Iwaze asaktsa Sudeja ezektsa Deus tuktsa  
 tsimysitsumuēhĩ tsihikiknaha kahyrinymyrēta  
 iwatahi batu ahabo papeu humo piwataha.

<sup>2</sup> Utakta botu Masedonia ezektsa pe:

– Sesus tuktsa Keresia ezektsa sinamybyitsa bo  
 mysitsumuēhĩ tsihikiknaha jatukta niytyktseheze  
 nisitsumuēhĩ tsihikiknaha – iky. Ana hi ziwaby-  
 nahaze asahi:

– Katsaktsa niwatihi sinamybyitsa bo tahat-  
 sumuēhĩ tsihikiknaha – niaha.

<sup>3</sup> Aba uta mytukytsa ahabo mysiakzoko. Ispe  
 iky:

– O Korītio ezektsa botu tahaokyrysaro  
 izikykyknaha. Ana hi mybo nyny  
 mahaze iwaze katsaktsa siokyrysaro tabykyk  
 sinamybyitsa bo nyny tsimaha – iky. Anawahi  
 iksasoikik. Ahaokyrysaro ty koro ahabyizeka  
 kaharere ba wasani my, iwatahi katukytsa ahabo  
 mysiakzoko, iwaze hawa ahabo botu iksaso  
 atsatu tsimykaranaha.

<sup>4</sup> Masedonia ezektsa katuk maha zeka  
 ahaokyrysaro ty koro habyizeka ahamo  
 mysikybyrētsa. Ikiahatsa kino niwatihi  
 ahaokyrysarobyi humo ahasikybyrētsa.  
 Kaharere ahasoho humo siokzeka batu wasani  
 ana humo hi kasikybyrēta.

<sup>5</sup> Iwatahi katukytsa kaharaze mysiakzo. Pahatsumuēhīnaha. Hawa ahaokyrysaro ty koro tsimaha zeka pahatsumuēhīkīnaha. Hawa botu tsiktsasonaha anaharere bo yhỹ tsimaha ana kino pahatsumuēhīnaha. Bykyze mozumuze mokymyba iwaze ustsā kytsa tihi:

– O Korītio ezektsa tahaokyrysaro ty nyny niaha. Ba ustsā harere humo nyny niaha. Asaktsa tahaokyrysaro ty pinyny tsihikiknaha hỹ – mykaranaha.

<sup>6</sup> Aty jokboha zuba mysiparik zeka jokboha zuba mysizozik. Aty mysiparik tohi zeka sizubarēna mysizozik. Iwa hawa nyny tsimykaranaha wata atsatu my. Ana bo hi mytsatyzitutahaktsa kytsa!

<sup>7</sup> Aty tapetu isopyk zeka:

– Kaokyrysaro ty ustsā kytsa bo ba nyny ziky – my. Iwa zeka nyny byity. Usta ape my zeka: – Aokyrysaro ty kytsa bo nynyty – my. Iwa zeka nyny byity. Ikiahatsa ahaokyrysaro ty ustsā bo tsipinyny tsihikiknaha zeka iwaze ahaokyrysaro ty nyny ty. Ahakurētsa nyny tsimaha. Iwa nyny tsimykaranaha zeka Deus okzeka wasani tsimykaranaha. Deus ahahumo tsimypokzitsiarēta hỹ.

<sup>8</sup> Deus hi isapyrēnikia ty ahabo nyny mykara. Deus tanamy ty tsizubarēna ahabo nyny my. Iwaze ikiahatsa hi ustsā kytsa bo ahanamy ty nyny tsimaha. Ahanamyrētsa ikiahatsahi:

– O mynamy ty tabiak tsihikiknaha – tsimykaranaha. Iwaze Deus humo ba ziknamybyi tsimaha.

<sup>9</sup> Iwa Deus papeu humo ziwataha:

– Aty tsimysapyrēta tu zeka tanamy ty sinamyby-  
itsa bo nyny mynakara.

Iwaze kytsa isoho “ataкта tsimykubiyhurēta”  
mynakaranaha

iwa Deus harere papeu humo ziwatahaka.

<sup>10</sup> Deus hi riktsa ty mybo nyny my. Riktsa  
jokboha tsimysipariknahaze puētsik zuba  
tsimysizoziknaha. Tsimysipariknahaze  
sizubarētsa tsimysizoziknaha iwa Deus  
mydisahawy ty mybo nyny mynakara. Nawa  
Deus isapyrēnikia ty mybo nyny mykara. Anawahi  
ahanamy ty tsizubarēna ustsа kytsa bo nyny  
tsimaha. Deus humo tsizubarēna kytsa bo nyny  
tsimaha! Iwaze ahahyryzikporētsa tsimoziknaha.

<sup>11</sup> Deus ahahumo tsimypokzitsiukrēta iwaze  
ustsa kytsa bo ahanamy ty nyny tsimaha. Iwaze  
sinamybyitsa Sudeja eze tihi:

– O myzo ikia zuba tsamysapyrēnikita, Korītio  
ezektsa sinamy ty mytsyhyryze Pauro tuktsa bo  
nyny niaha. Iwatsahi sihumo abo tsimysak-  
ibazikiknaha – maha.

<sup>12</sup> Sinamybyitsa mysitsumuēhīnahaze sakurētsa  
moziknaha. Asaktsa Deus bo mosakibazikiknaha.  
Asahi:

– O myzo ikia zuba amysakihikynikita tsimy –  
mykaranaha.

<sup>13</sup> Iwa tsimykaranahaze sinamybyitsa Deus pe:

– O myzo ikia zuba wasani tsimykara. Korītio  
ezektsa ahumo ka batu sisorek. Asahi Kiristu  
harere bo hȳ mynakaranaha. Kytsa sizubarētsa  
mysisapywykynaha mybo kino niwatihi nyny  
mykaranaha iwatsahi mykurētsa tsimozikzonaha  
– mykaranaha.

14 Asa hi Deus bo ahatsyhyryze napamykysokonaha, ahahumo simypokzitsirētsa. Asahi:

– O Deus myzo tsimysapywyikik. Korītio ezektsa batu sisorek mymypoکزitsikinaha. Ikia sihumo tsimypokzitsiukrēta iwatsahi nimytsumuēhīkīnaha – maha.

15 Niwazuba! Deus myhumo tsimypokzitsiukrēta hỹ. Deus tse babata mybarawy bo zipaha. Atahi ipokzitsianikia waha iwatsahi mykurētsa hỹ. Katsa hi:

– O Deus myzo ikia zuba amysapyrēnikita – tsimykaranaha. Iwa tahaktsa kytsa!

## 10

*Pauro Sesus Kiristu humo iakzohota kytsa mysipehaze pibetesaka.*

<sup>1</sup> Uta Pauro kapehawy ahabo motsasokoro. Deus harere ty pahahyrinymyry, Kiristu wata kakubyrisorokrēta. Atakta kytsa nisihyrinymyry uta iwata pahahyrinymyry batu kasakpare my. Ikiatsa kasoho humo:

– O Pauro nokponi zeka mymybetsakak, ata hi mytuk tu zeka ba zikmybetsak ana pokso tsipybyrēta – tsikaha.

<sup>2</sup> Iwatahi ahabo pomo zeka ba zahabetsak. Tsipimykinaha zeka pahabetsak. Asaktsa kasoho tihi:

– O Pauro mybarawy ezektsa harere bo zuba yhỹ nikara, iharere ka Deus harerebara – mybarapetu nikaranaha. Pykyhytuty asa bo pomo zeka mysibetsak.

<sup>3</sup> Mybarawy eze tu tsimyzurukunahaze mybarawy ezektsa watsa batu kasopyk hawa meky watu mytsaty mykara.

<sup>4</sup> Tsinaharapesukyrykynahaze katsaktsa mybetesawytsa mybarawy ezektsa byitsa. Deus hi katsaktsa mybetesawy, mybarawy betesawytsaktsa jokbohatsa tu Deus betesawy ka, aba zuba ba zihokyknaha. Ana hi Satanas zikwy atsoko pihokdawy. Kytsa nahapepehakanahatsa metutu nipaparabaiknaha siharere atsoko pihokdawy. Deus zikwy humo mytuku mynapykyryk, iwaze siharere atsoko pihokdawy.

<sup>5</sup> Asaktsa nahapepehakanahatsa aba zubatsa nizihikiknaha – mypehawy zuba Deus soho wasani my – mybarapetu mykaranaha. Iwa kytsa mysimywykynaha, kytsa Deus harere bo hỹ byi mykaranaha. Katsaktsa Deus zikwy mytuk zeka siharere mohokda. Iwaze kytsa sizubarētsa Sesus harere bo hỹ mykaranaha ihumo sispirikporētsa moziknaha.

<sup>6</sup> Aty pimyiwyzo zeka sinini my. Ikihatsa Deus harere humo hỹ tsimykaranaha ahatuk zeka estuba iharere bo hỹ habyi zeka atahi sinini my.

<sup>7</sup> O kytsa wabyziutaha! Ikihatsa mynury bo zuba iktsa ahasopyk. Aty ahape my zeka:

– Uta zuba Kiristu harere bo hỹ mykara Pauro tuktsa ja batu kanyhỹ – my. Isoho bo mytsatyziutaha! Katsaktsa Kiristu harere bo hỹ tsimykaranaha iwata tsimaha.

<sup>8</sup> Iwa tubabatu Deus zikpeha. Pahahyrinymyry naha humo zikpeha. Ana hi botu iktsasoko batu kasikpyby. Deus zikwatawy tahi pahatsumuēhĩkĩ.

Iwaze kapehawyo humo ahapunihiokrētsa tsimoziknaha, Sesus harere humo ahaspirikporētsa tsimoziknaha iwatahi zikwatawy. Ba zahabetsak. Ba zahasukatsihik ana humo hi batu katy peha.

<sup>9</sup> Ikiahatsa bo piwatahakaze papeu pokso ahapybyrētsa batu mozihikik.

<sup>10</sup> Aty zeka:

— O Pauro mybo zikziwatahakaze ziubaraty papeu humo ziknamybetsakak. Mytuk zeka mekta tu isopyk niy. Atahi:

“O Pauro ipunihikbyita tu iharere ba ziwaby-naha. Motsasoikik hawa mybo motsaso wasani ja”. Batu amy tohi mykara tsimaha — niy.

<sup>11</sup> Atakta ana kino nitsasoko kaharere bo wabyziuty! — Ahabo tsimynakozorenahaze myharere papeu waha my. Hawa botu tsiwatahanaha atsatu motsasoko — my. Iwa hỹ.

<sup>12</sup> Wastuhu kytsa ahatuk:

— O katsaktsa mysapyrēnikitsa — mykaranaha. Katsaktsa siwatsa batu tyso. Ba sihyrinomyry. Simytsatyhybyritsa tu hawa wasani zuba mykaranaha mytsaty aha byitsa mykaranaha. Deus okzeka batu wasani zikaha.

<sup>13</sup> Tsimytsasokonaha humo pykyhytu — katsa zuba myhyrinomyrētsa — batu tyso. — Deus hi botu ahabo nimypeha iwatsahi tsipahyrynomyrykynaha iharere bo hỹ tsimykaranaha ana humo zuba tsimytsasokonaha — nawa mysopyk. Batu mybarapetu tsimykaranaha.

<sup>14</sup> Katsaktsa tapara ahabo tsikzumunaha. Deus wasaniha ahabo tsiktsasokonaha. Deus hi:



– O Korītio ezektsa bo taha – niy. Deus nimypehanahatsahi ahabo tsikzumunaha.

<sup>15</sup> Bykyze ustsā kytsa ahabo izumunaha. Iwatsahi batu tyso:

– O katsa zuba Korītio ezektsa bo Sesus soho humo tsiksihyrinymyrykynaha – iwa ba zikaha. Ikiahatsa Sesus harere bo hỹ tsimykaranaha ana zuba tsimyzihikiknaha. Abahi tsipinymyrytohinaha iwatuze Deus harere humo zuba hỹ tsimykaranaha, mypehatsa harere bo zuba yh̃ tsimaha. Ana bo mymypeha anabo hi zuba tsimykurunaha.

<sup>16</sup> Deus wasania ty ahabo tsimytsasobanahaze nokponi tsimykurunaha. Sasabyitsa bo tsimyt-sasokonaha nanabyitaba sihudikhudikwy eze tsinakaranaha. Iwatsahi kytsa batu tyso:

– Pauro tuktsa tuk Deus wasaniha kytsa bo motsasokonaha. Kytsa Deus harere botu ziwaby-naha, sibo hi motsasokonaha – iwa batu tyso. Anaharere humo hi batu zikaha.

<sup>17</sup> Deus harere papeu humo ziwataha:

– Katsaktsa mysapyrētsa tsimaha zeka. Katsa kytsa pe: “O Deus myzo atahi zuba tsimys-apyrēnikita iwata tahaktsa kytsa!” – tsimaha.

<sup>18</sup> Katsaktsa mypetu mysopyk zeka:

– O myokzeka wasani tsimaha – iwa tsimykaranaha zeka batu aty tohi yh̃ mykaranaha. Deus zuba mype zeka:

– O ikiahatsa wasani tsimykaranaha – my. Iwaze zuba wasani tsimaha iharere hi tisapyrēna atahi mymybetesaka niy h̃.

# 11

*Pauro iwaze siakzohobyitsa simyspihik-batanikitsa tuk mykara.*

<sup>1</sup> Kyze motsasokoro ityrykmyita wata. Kaharere pykyhytu tsiwabyziunahaktsa! Kahumo ahakubyrisoroku ja.

<sup>2</sup> Deus ahahumo pahapokzitsiki nahawa tihi. Uta kino niwatihi pahapokzitsiki iwata my. Abaka ahahumo kasukatsihikrēta. Atatsa ityrykduwyhybyitatsa tuze iharerewabyhy zuba iakparawy ustsā mykyryburuktsa batu iakparawy. Atatsa watatsa ikiahatsa Kiristu zuba ahakparawy, ikiahatsa tihi:

— O Kiristu zuba mykparawy. Utsaktsa harerewabyhytsa batu mywabyhy — tsimaha. Iwa mozihihik.

<sup>3</sup> Ahasoho humo kasukatsihikrēta kytsa ahabo mybarapetu mykaranaha. Siharere tsiwabyziunaha zeka batu imysapy mytsaty tsimykaranaha. Iwatsahi Kiristu harere humo batu hỹ zikaha siharere humo tsimiwykynaha. Satanas Ewa zispihikbataka naha wa asaktsa ahabo mybarapetu mykaranaha. Siharere bo yhỹ tsimykaranaha zeka kasukatsihikrēta.

<sup>4</sup> Aty ahabo mozumuze iharere ezytyk motasoze ikiahatsa hi:

— O ahawaha batu mynyhy — tsimaha. Tapara Sesus babata soho ahabo tsiktsasotsasokonaha. Asaktsa batu. Sesus babata soho ahabo batu tysoho. Tapara Deus hyrikoso soho ahabo tsiktsasotsasokonaha. Asaktsa batu, Deus hyrikoso babata ahabo batu tysoho. Tapara Deus wasania ty zuba ahabo tsiktsasotsasokonaha. Asaktsa

siharere bo zuba yh̃ tsimykaranaha, siharere humo ahakurētsa. Hawa ha ty mektsatu motasonaha. Deus wasania ty batu tyso. Asa hi ahabo mybarapetu mykaranaha.

<sup>5</sup> Asahi ahabo mybarapetu mykaranahaze sihumo ahaharerewabymybarētsa tsimoziknaha. Deus zikwatawy atahi tazikwy ty kabo nyny niy pahamyiwybyiki iwatsahi kahumo ahamyharerewabyrētsa!

<sup>6</sup> Utakta kaharerehokzaharēta tu hawa ha ty iktsasoko wasani my. Utakta kahyrinymyrēta h̃ iwatsahi kytsa sizubarētsa kaharere humo yh̃ mykaranaha. Tsizubarēna ahabo ty iktsasoko ana humo hi ahahyrinymyrētsa.

<sup>7</sup> Ikiahatsa bo ikzumuze Deus wasania ty iktsasoko iwaze ahaokyrysaro ty kabo batu nyny tsikaha. Ahatukze kanamy tsikaeni tsibik zuba iky, iwa humo hi zikzuruku iwatahi Deus isapyrēnikia ty iharere ahabo iktsasoko. Deus wasaniha humo ihuakbara ty ikykara. Hawa wasani ikykara. Ikiahatsa kaharere humo Deus tyryktsa tsikyziknaha.

<sup>8</sup> Deus wasania ty ahabo iktsasokoze ustsas Sesus tuktsa siokyrysaro ty kabo nyny nikaranaha. Sesus tuktsa ustsas hudikhudikwy ezektsa siokyrysaro ty kabo nyny nikaranaha. Ahatsyhyryze siokyrysaro iakse iwa Deus wasania ty ahabo iktsasoze iwaze ihuakbara ty iktsaso.

<sup>9</sup> Utakta ahatuk zikzuruspykze batu aty tohi okyrysaro humo zikykybyikize batu ahatykda. Sesus tuktsa Masedonia ezektsa kabo izumunahaze tahanamy ty kabo nyny niaha. Ikzihihik

naha ty kabo nyny niaha. Ahabo batu ihuak ty ahabo tysapykyk iky ahabo kabokta batu aha.

<sup>10</sup> Deus wasania ty Keresia ezektsa bo motsasoko. Iharere baba wasani motsasoko, Kiristu harere kakparawy iwaze batu mybarapetu kasopyk. Kahyritzokzawy kytsa Deus wasaniha motsasoko batu pyk kasopyk, ana humo hi ihuakbara ty ikykara. Batu kytsa siokyrysaro ty kabo nyny zikaha. Niwazuba!

<sup>11</sup> Ikiahatsa hi:

– O Pauro myhumo imypokzitsiubyita tu myokyrysaro ty batu ziake – tsimyananaha. Niwazuba! Deus hi tsihyrinymyrēta, utakta ahahumo kamypokzitsiarēta ana humo kino tsihyrinymyrēta hỹ.

<sup>12</sup> Asaktsa simysapybyitsa hi:

– O katsaktsa Pauro tuktsa watsa tsimaha – mykaranaha. Batu ba. Utakta Deus harere wasania ty ihuakbara ty motsasoko. Asaktsa batu mekywatsa tu nikaranaha. Asahi ahaokyrysaro ziakekenaha iwatsahi batu mywa zikaha.

<sup>13</sup> Asaktsa kytsa Kiristu humo sipe ahabyitsa maha. – Katsaktsa Kiristu ykzohotsa – mykaranahaze mybarapetu mykaranaha:

– O Deus wasaniha tsimysasokonaha ana kino myhyritzokzawy – mykaranaha. Iwa mybarapetu mykaranaha.

<sup>14</sup> Utakta kapetu kasopyk:

– Satanas myzihawatahakanahatsa watsa niyziknaha mysipihikbatakanaha. Hawa skaraba Korītio ezektsa siharere bo yhỹ mykaranaha – batu mykara. Nawa batu mytsaty mykara. Satanas hi karipu karipuwu wata niyzik

iwaze kytsa bo mybarapetu mykara. Atahi bijoikpe iknykta Deus tsumuēhĩtsa wata mozik. Hawaha ta sa. Kytsa bo mybarapetu mykara ana humo hi mykara.

<sup>15</sup> Iwatsahi sitsumuēhĩtsitsa kino niwatihi nisipihikbatakanahatsa:

– Katsaktsa mymysapyrētsa – mybarapetu mykaranaha. Iwa kytsa mysisipihikbatakanaha. Anasoho humo hi batu mypyby. Deus zuba mokozoko hawa isapybara ty sibo nyny my.

*Pauro iakzohota Kiristu humo izuhuta nikara.*

<sup>16</sup> O kytsa ikiahatsa ba kape:

– Pauro ityrykmyita ana bo ka – mytsaty mytsaty byitaha. Ikiahatsa ahaokze ka ityrykmyita mytsaty tsimykaranaha zeka kasoho bo zuba tsipiwabynaha. Sispihikbatakanahatsa watsa – kamysapyrēta – mykara.

<sup>17</sup> Hawa ahabo motsasokoro kaharere ty zuba motsasoko. Deus mozihikik naha humo ahabo batu motsaso hawa mozihikik naha humo zuba ahabo motsasoko, ityrykmyita tawata motsasoko.

<sup>18</sup> Utsa kytsa botu ahape mykaranaha:

– O katsaktsa mysapyrētsa – niaha. Ana hi nitsasokonahaze sihumo ahamyharerewabyrētsa ana hi nizihikiknaha. Siwatsa uta kino niwatihi – Kamysapyrēta – my.

<sup>19</sup> Ahape tu ahasopyk:

– Katsaktsa myhyrinymyrētsa hỹ – tsimykaranaha. Ikiahatsa sityrykmyitsa harere ahakparawy.

<sup>20</sup> Asaktsa pahakyzonahaze sihumo ahakparawy. Pahaspihikbatakanahaze sihumo ahakparawy. Ahadisahawy piaksekenahaze

ahakparawy. Sihumo ahanamybyitsa tu tsinakaranaha. Pahakikinahaze sihumo ahakparawy ahaspirikpobyitsa tu tsimykaranaha.

<sup>21</sup> Katsaktsa sisopyk humo mysikpybyrētsa tsimykaranaha.

Wastuhu kytsa:

– O mysapyrētsa hỹ –. Utakta iwa niwatihi – O kamysapyrēta my – ityrykmyita wata motsasoko mybarawy ezektsa soho waha natasokonaha.

<sup>22</sup> Asa tihi:

– Katsaktsa Ebereutsa – mykaranaha. Uta kino niwatihi Ebereu tihi. – Katsaktsa Isareu ezektsa – mykaranaha. Uta kino niwatihi Isareu ezekta tihi. – Katsaktsa Abarão tsekokatsa – maha. Uta kino niwatihi Abarão tsekoka tihi my.

<sup>23</sup> – Katsaktsa Kiristu tsumuēhĩtsa – mykaranaha. Uta kino niwatihi, Kiristu harere bo hyỹ mynakara ana soho motsasoko zeka katyrykmyita wata my. Kiristu humo tarabaja abazuba ikykara itsumuēhĩkĩ hỹ. Ihumo sakyriukrēnikitsa hurukwy bo kytsa zikoktyhyryknaha. Asaktsa batu sakyriukrēnikitsa hurukwy bo batu isty okty. Kytsa zikikinaha myraratsa hwyk ty tsizezerēna ty zikikinaha. Asaktsa batu skiok. Kytsa asiba zikbezenaha zikikinaha. Asaktsa batu isty ba.

<sup>24</sup> Taparaktsa Sudeutsa zikihikiknaha. Mytsyhyry wa zikikinaha. Kasukpetara baze zikikinaha. Tirĩta nowe zikikinaha.

<sup>25</sup> Homa ezektsa kino niwatihi zikikinaha. Harakykbyi kasukpetara baze hwi ty zikikinaha. Asaktsa siakyriukrēnikitsa harahare ezektsa ty zikarawowokonaha. Zikbeze tsihikiknaha iwa nikaranaha. Harakykbyi buburu zuba

buruk ikukuruze tsaraha puētsikbyita niharazuk. Estubaka buburu zuba buruk unata iknatsutsuku okoroze iwa pihik eze ikapykyryk nimyra bo batu zuk.

<sup>26</sup> Nanabyitaba ziknaukuruze kytsa asiba zikbezenaha. Buburu inapokze. Sitsyhyryboarētsa kanamy ziaaksebaiknaha. Sudeutsa taparaktsa kasukyrytsita zikbezekyzykynaha. Sudeutsabyitsa kino niwatihi zikbezekyzykynaha. Sihudikhudikwy burukze kytsa zikbeze kyzykynaha. Jerukbara bo niwatihi kytsa zikbezekyzykynaha. Buburu zuba bo asiba ikarazuk. Kytsa tihi:

– Katsaktsa aharereziuwy tsimaha – mybarapetu nikaranaha. Sihumo asiba ikyrikosokda.

<sup>27</sup> Tarabaja tsizubarēna ikykara. Kahyrizik-tsokzawy humo batu kaōtutsa. Kadisahawy nepykze kadisahawybyita karapa zikziykyk. Karapukrēta ikykara. Batu kasuku. Kasukbyita iwarik zikziykyk.

<sup>28</sup> Iwa sinini mynakara. Pibiyuhukutu Sesus tuktsa sizubarētsa soho mytsaty mytsaty mykara. Kapetu kasopyk:

– Kytsa asahi Sesus harere bo hyŷ mykaranaha wasani ja mykaranaha – my. Sihumo kamypokz-itsiarēta iwatahi mytsaty mytsaty mynakara.

<sup>29</sup> Aty Sesus harere bo hyŷ mykara wasani baraty my zeka uta ituk kasukatsihikrēta. Batu myku tsimaha. Aty Sesus harere bo hyŷ mykara imysapybyita mykara zeka uta ituk kasukatsihikrēta. Batu myku tsimaha.

<sup>30</sup> Kytsa sizubarētsa kasoho humo sihyrinymyrētsa. Kazikwybyita sihyrinymyrētsa.

Ana kino motsaso tsihikik.

<sup>31</sup> Deus hi kaharere piwabykyze atahi tsihyrinymyrēta hỹ. Ikiahatsa bo batu mybarapetu my atahi tsihyrinymyrēta. Deus mymypehaka Sesus Kiristuzo. Katsaktsa ipe tsimaha:

– O Deus ikia zuba koiknybaktatu hỹ amys-apyrēnikita – tsimykaranaha.

<sup>32</sup> Iwaze Damasko eze tuze sipehatsa Aretas inarokota atakta zikbeze tsihikik. Iwatahi iperytsitsa Damasko hokbowy baze zikuparahakanaha katsipa humo zikokty tsihikiknaha.

<sup>33</sup> Katukytsa ziktsumuēhīnaha. Unata eze zikoktyhyryknaha tsahi tsoromapeza eze tu iziksipikiknaha ape bo niaha. Hokbowy buruk iknasik. Iknawak. Iwaze Damasko ekze ikparakik, iwa ikwakik.

## 12

*Pauro Deus hudikhudikwy zitsotospykykze ziny.*

<sup>1</sup> Uta ahabo motsasokoro – kamysapyrēta my – ahape mykara. Anaharere batu imysapy iwatuze motsasoko. Mypehakatsa isapyrēnikia zikwatahawy, hinibytatu zitsotospyk wa ha isapyrēnikia iny, ana soho ahabo motsasoko.

<sup>2</sup> Tubabatu katorise niytyk tseheze Deus hudikhudikwy bo zikoktyhyryk. Uta zikoktyhyryk ja. Zitsotospykyrykze zuba ja. Batu kanyhy. Deus zuba tsihyrinymyrēta.

<sup>3</sup> Atsoko tasapy bo zikoktyhyryk tawa ihudikhudikwy bo iktsukze tisapyrēna. Utakta



zīkoktyhyryk ja. Zītsotospykykze ja. Batu kanyhy. Deus zuba tsihyrinymyrēta.

<sup>4</sup> Anaeze iharere tisapyrēna iwaby. Anaharere ty kino batu tyso. Mybarawy ezektsa bo batu harere my.

<sup>5</sup> Deus hi zīkoktyhyryk iwatahi ustsā bo – Kamysapyrēta – my batu tyso. Uta kino kazikwybyita tu kytsa sihyrinymyrētsa ana humo hi motsasokoro. Kapunihikbyita tu ana hi motsasokoro.

<sup>6</sup> Utakta – kamysapyrēta – my zeka wasani my. Batu katyrykmyita. Hawa ha ty wasania ty zuba ahabo motsasoko. Iwaze kaharere ty – kamysapyrēta – batu tyso. Ikiahatsa kasoho humo botu ahahyrinymyrētsa. Hawa zīkzuruku naha humo ahahyrinymyrētsa. Hawa motsasoko ana humo kino ahahyrinymyrētsa. Kasoho tyka sosobyi my, hawa sa kasoho mytsaty tsimykaranaha wasani my batu meky watu mytsaty tsimykaranaha.

<sup>7</sup> Deus tahudikhudikwy bo zīkoktyhyrykze isapyrēnikia tsizubarēna ikzinyre. Tawata iwaze Deus tapetu isopyk:

– Pauro isapyrēnikia ty ziny. Ana humo hi tozeka ja “aba zubata ja” my – niy. Iwaze Deus zīksininiwyky. Iharere humo Satanas pikmyit-sapyriwyky iwatahi kamyitsapyrēta mozīk.

<sup>8</sup> Kamyitsapyrize harakykbyihi Deus pe iky:

– O Deus myzo tsīkzororowykta! – iky. Deus bo ikzapykykyk.

<sup>9</sup> Iwaze Deus kape niy:

– Ba zazororowy. Kazīkwy ty zuba abo nyny mykara. Akubyita tuze kazīkwy ty puētsīk abo nyny mykara ahumo kamypokzītsīarēta hỹ –

niy. Iwatahi kamyitsapyrēta my ana humo hi kakurēta. Utsa kytsa pe:

– Utakta kapunihikrēta – my. Iwa ba ziky.  
– Kamyitsapyrēta tuze kakurēta. Pibiyituhukutu Kiristu zikwy ty kabo nyny mynakara – my.

<sup>10</sup> Iwa ustsā kytsa pe mykara:

– Kamyitsapyrēta tuze kakurēta hỹ. Kiristu pokzi kamyitsapyrēta iwatahi kakurēta. Iwaze kytsa kahumo myziakaranaha, zikmyijaikik-naha, batu kanamyky, asaktsa Sesus harere bo batu yhỹ nikaranaha ziksukyrykynaha iwatahi sinini mykara iwatatu kakurēta. Kazikwybyita tu mypehakatsa zuba tazikwy ty kabo nyny mykara – niy.

*Pauro Sesus tuktsa bo paikpa mytsaty nikara.*

<sup>11</sup> Kaharere ityrykmyita wata. Ikiahatsa kahumo tsiharereziubyikinaha iwatahi pikbetesaka. Ahaokzeka utakta amy tohibyita wata. Asaktsa ahabo mybarapetu mykaranaha. Deus pehabyitsa tu mykaranaha sihumo ahakparawy asahi simyspihikbatanikitsa zuba mykaranaha. Ahaokzeka Deus pehakatsababatsa mytsaty ahabyitsa tsimykaranaha. Hawa mykaranaha utakta niwatihi mykara.

<sup>12</sup> Ahatuk ikapykyrykze hawa Deus pehaha mykara atsatu ikykara. Deus zikwy katuk zik-napykyryk ana kino ziwatawy. Amy ty kytsa batu zikaha Deus zikwy humo ikykara. Si-watawyhytsa humo ikiahatsa tsipybybaiknaha. Ahatukze kakubyrisorokrēta ikykara iwa Deus harere humo wasani zahahyrinymyryky ana kino ziwatawykyry.

<sup>13</sup> Deus wasania ty ustsā Sesus tuktsā, asaktsā inazuzuknaha Deus harere bo piwabykynaha, sibo Deus pehatsā nitsasokoronahaze nisisapywykynaha ahatsā watsā bo ikykara. Asaktsā tahanamy ty sibo nyny nikaranaha. Ikiahatsā batu. Ahanamy ty kabo batu nyny aha. Iwa ikzihik. Ana kino batu tyso – O Pauro myhumo batu iakparawy – batu tyso. Aha humo kakparawy.

<sup>14</sup> Utakta petok baba ahabo iknakozore. Abaka asiba mokymyky ahabozo. Ikiahatsā ahaokyrysaro ty ba zikzihik. Ikiahatsā zuba Sesus harere bo hỹ tsimykarana mozihihik, ahanamy batu mozihihik. Ikiahatsā kahyrytsā watsā. Sizotsā tahahyrytsā okyrysaro humo pikorohyk. Sihyrytsā sinamy ty tahazotsā bo batu nyny zikaha, ana hi sizotsā batu simozihikik. Iwa hỹ.

<sup>15</sup> Utakta pahatsumuēhĩ tsihihik, kanamy ty ahabo nyny my zeka ana hi moziykykuwyky. Kytsā ahatsyhyryze pikbezenaha zeka yhỹ my ahahumo kamypokzitsiarēta hỹ. Ikiahatsā ja. Tsikaeni zuba kahumo ahakparawy.

<sup>16</sup> Ikiahatsā kasoho ty tsimypamykysonahaze:  
– Pauro mytukze mynamy batu ziaксе iwatsatu myokyrysaro ty ihumo nepyk iwatahi mybo mybarapetu nikara, nimyspihikbataka – tsimaha.

<sup>17</sup> Kaharereziuwyttsā ahabo iksipehahik batu zahaspihikbatakanaha.

<sup>18</sup> Kaharereze Titu ahabo zumu. Mytsy itukta niwatihi ahabo zumunaha. Asaktsā ahanamy ty batu tykse. Titu kawata, katsaktsā wasani tsimykarana. Katsaktsā ahahumo mysopyk tsimykarana hỹ.

19 Ikiatsa hi:

— O Pauro tuktsa asa tu tahabetesaha tsihikiknaha — tsimaha. Mytsaty ahabyitsa tsimykaranaha Deus okze ka tsimytsasokonaha. Ihumo zuba tsimybetesahakanaha. Kiristu nimywatawy ana humo hi tsimybetesahawynahaze ahatsyhyryze tsimytsasokonaha. Katsaktsa ahahumo mypokzitsirētsa, iwatsahi pahatsumuēhī tsihikiknaha. Ahapunihkrētsa tsimoziknaha ana hi tsimyzihikiknaha.

20 Ahasoho bo mytsaty ziknakara. Ahabo pmoze ja mekywa tu tsimykaranaha. Iwa ha bo mytsaty mykara. Ikiatsa kino niwatihi. Kasoho bo mytsaty tsimykaranaha, meky watu sa my. Ahabo pmoze ja tsimyharape sapybyikinaha ja. Ahazokdiharētsa ja. Awakytza humo ja tsipahaukanikinaha. Ahabo zuba ja mytsaty tsimynakaranaha. Tsikaharapehudizuikiknaha ja. Ahaharere wabymybarētsa ja. Ahaharereziubyitsa tu metutu tsimopaparakanaha ja. Batu astsa bo tu mytsaty tsimykaranaha ja. Iwa tsimykaranaha zeka pahabetsak. Pahabetsakwynahaze ahasukatsihikrētsa tsimoziknaha. Batu ahaku.

21 Ahasoho bo paikpa mytsaty mynakara. Ahabo mynakozoreze ahahumo kasukatsihikrēta. Kytsa ahatur zeka simysapybyitsa tu nikaranaha. Utsa okeza bo nisioktyhyryknaha. Wastuhu kytsa makutsa tu mynaharapeokorokonaha. Utsa nisimyibakanaha. Iwa tsikykaranaha zeka ana humo hi batu ahaku. Ahamysapybyitsa tu tsimykaranaha ty moewy byizeka kasikpybyrēta mozik. Deus okze ka ahahumo kasikpybyrēta.

# 13

## *Pauro Sesus tuktsa nisisukpehe.*

<sup>1</sup> Abaka harakykbyihi ahabo mynakozone. Aba ahabo mynakozonezo. Deus harere papeu humo ziwatahaka:

– Aty zeka usta maku soho motsasoze: “O tohi batu mysapy my” ba hỹ taha. Petoktsa zuba harakykbyihitsa ja mopamykysokonaha iwa kytsa maha zeka: “O tohikta batu mysapy my” iwaze yhỹ tsimaha – niy. Iwa Deus harere papeu humo ziwatahaka.

<sup>2</sup> Utakta botu petok baba ahabo iknakozone. Asaktsa tahamysapybara ty batu moewy iwatahi iksibetsakak. Iwa mykarazo. Ahabo mynakozonezoze asaktsa tahamysapybara ty moewy ahabyizeka mysibetsakzo, sihumo kasakaniharẽta mozik. Usta kytsa batu tysipeha niwathi asa humo hi kasakaniharẽta.

<sup>3</sup> Utakta Kiristu harere zuba ahabo motsasokoro. Ana hi tsinymyry tsihikiknaha. Atahi ahatukze tsipunihikrẽta niy, atahi zikwy ziwatawy hỹ, ana humo kino ahahyrinymyrẽta. Utakta simysapybyitsa humo mysibetsakze ikiahatsa hi:

– O anahi Kiristu harere hỹ – tsimykaranaha.

<sup>4</sup> Kiristu mybarawy eze zikzurukuze tazikwy zerekik. Iwaze kytsa zibezenhaze iharapatawyhyta humo zihyrikiknaha izikwybyita zibezenhaha. Deus zihyrikikpowy abaka izikwyrẽnikita niyzikzo iwa ispituzo my. Katsa ituktsa tsimaha. Katsa kino niwathi mybarawy ezektsa batu mypunihik. Abaka Kiristu harere bo zuba hyỹ tsimykaranahaze Deus

hyrikoso mytuk mynapykyryk. Katsa Korītio bo tsimopomonahaze izikwy humo mypunihikrētsa tsimoziknaha. Ahatsyhyryze izikwy katuk mynapykyryk iwatahi tsipahatsumuēhīekiknaha. Iwa hỹ.

<sup>5</sup> Ikiahatsa hi ahasoho ty mytsatzyiutahaktsa! Ahape tu ahasopyk:

– Sesus harere bo ja hyỹ tsimykaranaha. Iharere humo ja ahaspirikporētsa. Deus hyrikoso ja mytuk mynapykyryk baba – tsimykaranaha. Iwa ahape tu ahasopyk. Ikiahatsa Sesus Kiristu harere bo hyỹ tsimaha zeka iwaze ituktsa tsimoziknaha ana humo kino ahahyrinymyrētsa. Iharere bo hyỹ ahabyizeka Kiristu batu ahatak ziknapykyryk.

<sup>6</sup> Katsaktsa Kiristu humo myspirikporētsa babatsa tsimaha zeka, iharere bo zuba pykyhytu hyỹ tsimykaranaha ana humo kino ahahyrinymyrētsa, ana hi tsimyzihikiknaha.

<sup>7</sup> Ahatsyhyryze Deus bo tsimypamykysokonaha. Katsahi:

– O Deus myzo Korītio ezektsa tysitsumuēhīkta! Simysapybyitsa nikaranaha anahi pimoewynaha iwa tysitsumuēhīkta! – tsimaha. Ikiahatsa wasani tsimyzurukunaha ana hi mozihikik. Utsa kytsa tihi:

– O Pauro tuktsa Korītio ezektsa nisi-hyrinymyryziukunaha iwatsahi siharere humo simysapyrētsa moziknaha – maha. Ana harere kino ba zikzihikik. Utsa kytsa tihi:

– O Pauro tuktsa Korītio ezektsa nisimyikinaha – maha. Ana harere kino batu waby iky.

<sup>8</sup> Deus harere ba hawa tohi zikzukninaha. Ana harere bo hỹ tsimykaranaha iwaze ustsā kytsa bo tsimysitsumuēhīnaha zikaha, hawa wasani mykara ana ty kino hỹ mykaranaha tsimysitsumuēhīnaha.

<sup>9</sup> Iwaze katsaktsa mypunihikbyize wasani tsimykaranaha. Iwaze ikiahatsa ahapunihikrētsa zeka mykurētsa tsimoziknaha. Iwaze ahatsyhyryze Deus bo tsimypamykysokonaha:

— O Deus myzo Korītio ezektsa tysitsumuēhīkta! Azikwy situk mynapykyryk iwatsahi tahamysapybara humo nimityhikbyrinaha abaka simysapyrētsa babatsa moziknaha awatahaktsa — tsimaha.

<sup>10</sup> Aba ahabo piwataha, papeu ty kaharaze pohyryktykta. Iwaze ahabo pomoze ba pahabetsakzo. Ahahumo batu kasakani Deus zikwy katuk mynapykyryk iwaze pahatsumuēhī ana hi mozihikik. Deus hyrikoso bo yh̃y tsimaha ana hi mozihikik. Atahi batu zaha my. Uta kino niwatihi. Ba pahabetsakzo iwatahi papeu ahabo ziskyryk. Hawa taeze ahabo pomo. Iwa h̃y.

<sup>11</sup> O katukytsa kawatahaha ahabo asiba nepyk. Ahamysapyrētsa tynakaranahaktsa kytsa! Kaharere bo wabyziutaha. Tyharape pokzitsikinahaktsa! Sesus tuktsa atsawatu mytsaty tsimykaranaha. Ikiahatsa tuk yh̃y tsimykaranaha. Iwaze Deus ahahumo tsimypokzitsiarēta, atahi pahahyrinymyryky ihumo ahakurētsa tsimoziknaha. Deus ahatur tawahi mynapykyryk h̃y.

<sup>12</sup> Tynaharape hapyrykyknahaktsa iwa ustsā pe hawa taharapepokzitsikinaha

tsimymywatawynaha. Asaktsa Sesus humo  
sispirikporētsa katuk hi:

– O Korītio ezektsa humo myhyrizikbarētsa –  
mykaranaha.

<sup>13-14</sup> Ahatsyhyryze Deus bo mopamykyso:

– O mypehakatsa Sesus Kiristu Korītio ezektsa  
tysisapywyky. O Deus myzo sihumo tysipokz-  
itsiukta! O Deus hyrikoso situk tawahi my-  
napykyrykta! – my. Niwazuba.

Pauro niy



# **Deus Harere Aibaky Sesus mymyspirikpoko naha**

## **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

2f0260ea-5969-5180-9ac5-183d63a989f1